

金史

五



本紀第十五

金史十五

開禧儀司在國錄事司書五部修國史領經筵事都總管脫脫奉

勅修

宣宗中

興定元年春正月己卯朔宋遣使來賀癸未宋使朝辭上
謂宰臣曰聞息州南境有盜此乃彼界飢民沿淮爲亂耳
宋人何故攻我高琪請伐之以廣疆土上曰朕意不然但
能守祖宗所付足矣安事外討乙未詔中都西京北京等
路策論進士及武舉人權試于南京東平婆速上京等四
路丙申東平行省言調兵以來吏卒因勞進爵多至五品

例獲封贈及民年七十並該覃恩若人往自陳公私俱費
請令本路爲製誥勅類赴朝廷以求印署使受命者量輸
諸物而給之人力不勞兵食少濟從之皇子平章政事濮
王守純授世襲東平府路三屯猛安尚書左丞詹鼎進平
章政事封華國公癸卯議減庶官冗員乙巳

大元兵攻觀州二月戊申朔初用貞祐通寶凡一貫當貞
祐寶券千貫已酉命樞密院汰罷軟軍士諭尚書省用官
馬給驛傳以紓民力庚戌皇后生辰詔百官免賀仍諭旨
曰時方多難將來長春節亦免賀禮辛亥以崇進元帥右
都監完顏賽不簽樞密院事癸丑罷招賢所乙卯皇孫生

宣徽請稱賀詔無用樂已未

大元兵徇忻代詔定州縣官雖積階至三品坐乏軍儲者
聽行部決遣壬戌尚書省以軍儲不繼請罷州府學生廩
給上曰自古文武並用向在中都設學養士猶未嘗廢況
今日乎其令仍舊給之丙子議置莊獻太子廟三月戊寅
勅事關刑名當面議之勿聽轉奏以絳陽軍節度使李革
知平陽府兼河東南路兵馬都總管權參知政事行尚書
省壬午定民間收潰軍亡馬之法及以馬送官酬直之格
乙酉上宮中見蝗遣官分道督捕仍戒其勿以苛暴擾民
庚寅長春節宋遣使來賀辛卯詔罷平陽河中元帥乙未

先徵山東兵接應苗道潤共復中都而石海據真定叛慮
爲所梗乃集粘割貞郭文振武仙所部精銳與東平軍爲
掎角之勢圖之已亥

大元兵攻新城庚子攻霸州甲辰威州刺史武仙率兵斬
石海及其黨三百餘人降葛仲趙林張立等軍盡獲海僭
擬之物尋進仙權知其定府事夏四月丁未朔以宋歲幣
不至命烏古論慶壽完顏賽不等經略南邊戊申孟州經
略司萬戶宋子玉率所部叛斬關而出經略使從坦等追
敗之庚戌花帽軍作亂于滕州詔山東行省討之南陽五
朶山盜發衆至千餘人節度副使移剌羊哥出討遇之方

城招之不從乃進擊之殺其衆殆盡癸丑以安化軍節度使完顏窩權元帥左都監行元帥府事督經略使苗道潤進復都城且令和輯河間招撫使移剌鐵哥等軍鐵哥與道潤不協互言其有異志故命重臣臨鎮之戊午單州雨雹傷稼詔遣官勸諭農民改蒔秋田官給其種平定州賊閻德用之黨閻顯殺德用以其衆降己未以權參知政事遼東路行省完顏阿里不孫爲參知政事行尚書省元帥府于婆速路以權遼東路宣撫使蒲察五斤權參知政事行尚書省元帥府于上京庚申李華請罷義軍總領使副以昇州縣尚書省以秋防在邇改法非便姑如舊制州縣

各司察之甲子元帥完顏賽不破宋兵于信陽使來奏捷
乙丑濟南泰安滕充等州賊並起侯摯遣棣州防禦使完
顏霆討平之降其壯士二萬人老幼五萬人完顏賽不復
奏敗宋軍于隴山等處俘馘甚衆戊辰太白晝見于井辛
未權孟州經略使從坦追賊宋子玉至輝州境上其黨邢
福殺子玉以衆來歸壬申以萬奴叛逆未殄詔諭遼東諸
將完顏賽不軍渡淮破光州兩關獲軍實分給將士五月
戊寅陝西行省破夏人于大北岔是日捷至丁亥民施汝
濟上書陳利害上以示宰臣曰卑賤小人猶能盡言如此
有可采者即行之己丑賊宋子玉餘黨家屬悉放歸農尚

書右丞蒲察移刺都棄官擅赴京師降知河南府事行樞
密院兼行六部事壬辰延州原武縣兩雹傷稼詔官貸民
種改蒔癸巳宋人攻潁州焚掠而去戊戌行樞密院兵敗
宋人於泥河灣又敗之樊城縣山東行帥府事蒙古綱擅
械轉運使李秉鈞法當決秉鈞返署綱應論贖詔兩釋之
宋人取漣水縣癸卯蘭州水軍千戶李平等苦提控蒲察
燕京貪暴殺之構夏人以叛脅其徒張宸俱行宸以計畫
獲之陝西行省便宜遷宸官四階授同知蘭州事賞士卒
有差以其事上聞甲辰

大元兵下沔城縣軍官任福死之丙午定河北求仕官渡

河之法曾經總兵者白樞密院餘驗據聽渡行樞密院事
烏古論慶壽南伐還奏不以實詔鞠之六月己酉苗道潤
表歸國人李琛復以衆叛琛亦表道潤異謀詔山東行省
察之修瀘關遣中使持詔及暑藥勞夫匠權參知政事張
行信進參知政事庚戌詔捕治遼東受僞署官家屬得按
察使高禮妻子皆戮之壬子制鄜坊丹州四品以下州縣
官視環慶例以二十月終更甲寅招撫使惟宏言彰德府
守臣擅徙民山砦避兵上曰難保之城守之何益徒傷吾
民耳勿治乙卯顯宗忌日謁莫于啓慶宮丙辰詔樞密院
遣經歷官分諭行院嚴兵利器以守衝要仍禁飲宴違以

軍律論宋人合土寇攻東海境戊午以宋遣兵數犯境及
歲幣不至詔諭沿邊興宋已未詔凡上書人其言已采用
者上其姓名辛酉以進士朱蓋草澤人李維嶽論議可取
詔給八貫石俸乙丑設潼關使副及三門集律提舉官尚
書左丞相兼都元帥僕散端瑨輟朝置南京沅泉務遼東
行省遣使來上正月中敗契丹之捷秋七月丙子朔日有
食之辛巳宋人圍泗州壬午圍靈璧縣癸未陳州振威軍
萬戶馬寬逐其刺史李策據城叛遣使招之乃降已而復
謀變州吏擒戮之夷其族甲申詔諭遼東諸路乙酉宋人
襲破東海縣丙申置提舉倉場使副癸卯太社壇產嘉禾

一堦十有五穗甲辰夏人犯黃鶴空官軍敗之乙巳初置
集賢院知院事同知院事等官宋人及土寇攻海州經略
使擊破其衆夏人圍羊狼寨帥府發諸鎮兵擊走之八月
戊申陝西行省報木波賊犯洮州敗績遁去木星晝見于
昴六十有七日乃伏已酉海州經略司表官軍與宋人戰
石湫南戰連水縣戰中土橋宋兵敗績壬子削御史大夫
水錫官爵有司論失律當斬上以近族特寬其死癸丑宋
人攻確山縣爲官軍所敗詔諭國內軍士使知宋人渝盟
之故仍命大臣議其事乙卯集賢院詔議官朱蓋上書陳
禦敵三策壬戌海州經略使阿不罕奴失刺敗宋人于其

境提控李元與宋人戰屢捷多所俘獲徙攔通渡經略司
於黃陵峒乙丑制增定擒捕逃軍賞格及居停人罪丙寅
左司諫僕散毅夫乞更開封府號賜美名以尉氏縣爲刺
郡睢州爲防禦使與鄭延二州左右前後輔京師上曰山
陵在中都朕豈樂久居此乎遂止癸酉太祖忌日謁奠于
啓慶宮甲戌元帥右都監承裔遣其部將納蘭記僧等合
餽俄族都管尼兀古以兵掩襲瓜黎餘族諸蕃帳屢破之
斬馘士卒禽其首領俘獲人畜甚多是日捷至九月丁丑
更定監察御史失察法以元帥左監軍必蘭阿魯帶權參
知政事行省于益都戊寅夏人犯緞德之克戎寨都統羅

世暉逆擊却之己卯蔡州帥府偵宋人將窺息州以輕兵誘其進別以銳師邀擊之虜其將沈俊壬午以改元興定赦國內甲申罷規運所設行六部辛卯

大元兵徇隰州及汾西縣癸巳攻沁州遼東行省完顏阿里不孫爲叛人伯德胡土所殺月犯東井西扇北第二星乙未

大元兵攻太原斂箕掌寨丁酉薄太原城攻交城清源癸卯立汾河水墻鹿角冬十月丁未以霖雨詔寬農民輸稅之限庚戌以將有事于宋詔帥臣整厲師徒辛亥遣官括市民馬紅賞格以示勸甲寅命高汝礪張行簡同脩章宗

實錄息州帥府獻破宋人于中渡之捷乙卯

大元兵徇中山府及新樂縣丙辰丹州進嘉禾異畝同類
辛酉制定州府司縣官失覺姦細罪壬戌右司諫兼侍御
史許古上疏請先遣使與宋議和乙丑

大元兵下磁州丙寅定職官不求仕及規避不赴任法高
汝礪上疏言和議先發於我恐自示弱非便戊辰上命許
古草通宋議和牒既進以示宰臣宰臣以其言有祈哀之
意徒示微弱無足取者議遂寢辛未罷流泉務

大元兵收鄒平長山及淄州壬申改鄒國號爲管遼上嫌
名高汝礪奏致仕不允壬午徙宜穆刺買奴言五臺山賊

魚張二等若悉誅之屢詔免罪恐乖恩信且其親屬淪落
宋境近在均州或相構訛乞貸其死徙之歸德雖陳鈞許
間爲便詔許之終未月暈木火二星木在胃火在昴丙戌
太白晝見遣翰林侍講學士楊雲翼祭之

大元兵收山東濱棣博三州己丑下潞州庚寅下沂州甲
午河西掬納鐵納等族千餘戶來歸丁酉詔唐鄧蔡州行
元帥府舉兵伐宋戊戌

大元兵攻太原府庚子上謂宰臣曰朕聞百姓流亡遭賦
皆配見戶人何以堪又添徵軍須錢太多亡者詎肯復業
其并議除之宰臣請命行部官閱實蠲貸已代納者給以

恩例或除他役或減本戶雜征四之一上曰朕於此事未嘗去懷其亟行之十二月甲辰朔

大元兵攻潞州都統馬甫死之戊申即墨移風砮於大舶中得日本國太宰府民七十二人因糴遇風飄至中國有司覆驗無他詔給以糧俾還本國庚戌元帥左監軍蒲察五斤進右副元帥權參知政事充遼東行省是日

大元兵平益都府辛亥陝西行省胥鼎諫伐宋不報甲寅海州經略使報提控韓璧敗宋人于鹽倉己未

大元兵復攻沂州官民棄城遁辛酉下密州節度使完顏寓死之壬戌侯摯兼三司使庚午免逃戶復業者差賦

二年春正月乙亥詔議賑恤辛巳勅南征將帥所至毋縱殺掠壬午宋人攻淮北唐州元帥府擊敗之獲統領李雄韜陳皋以歸癸未近侍局副使訛可遣使報南師之捷乙酉陝西行省獲歸國人言

大元兵圍夏王城李遵頊命其子居守而出走西涼詔諭諸帥府明斥候嚴守備戊子唐鄧元帥完顏賽不報連破宋人之捷宋人攻泗州又戰却之二月癸卯宋人侵青口行樞密院遣兵敗之甲辰免中京嵩汝等州逋租諭胥鼎克宋散關可保則保不可保則焚毀而還定奴婢挾主法丙午訛可敗宋人于防山統石烈桓端亦遣使來上光州

信陽之捷庚戌海州經略敗宋兵于朐山表請繼其軍儲
督東平帥府發兵護送資糧以應之許州長社縣何冕等
謀反伏誅辛亥張行信出爲彰化軍節度使兼涇州管内
觀察使壬子御史以北兵退請汰各處行樞密院元帥府
冗官尚書以爲非便上從尚書言仍舊制完顏賽不報棗
陽之捷癸丑完顏阿鄰報皂郊堡之捷丁巳壽州行樞密
院破宋人高柳橋水砦夷其砦而還壬戌訛可遣兵拔宋
柵碁盤嶺又破其衆於裴家莊寒山嶺龍門關等處得粟
二千餘石乙丑諭樞密曰中京商號諸州軍人願畊屯田
比括地授之聞徐宿軍獨不願受意謂予田必絕其廩給

也朕肯爾耶其以朕意曉之丙寅諭尚書省曰聞中都納粟官多爲吏部繳駁殊不思方闕乏時利害爲如何又立功戰陣人必責保官若輩皆義軍白丁豈識職官苟文牒可信即當與之至若在都時規運薪炭入城者朕嘗植恩授以官此豈容僞而間亦爲所沮格其悉諭之勿復若是紇石烈牙吾塔破宋人于盱眙軍上俘獲之數已已以侯擊行省河北兼行三司安撫司事三月庚辰尚書集文資官雜議進士之選詔依泰和例行之癸未訛可敗宋人于光化軍甲申長春節戊子諭宰臣曰舊制廷試進士日晡後出宮近欲復舊恐能文而思遲者不得盡其才其令日

沒乃出以御史中丞把胡魯爲參知政事陝西行六部尚書楊貞削五官累杖一百七十解職訛可表言官軍自桐柏入宋境所向多克捷癸巳宋人爭皂郊堡擊官軍軍潰主將完顏阿鄰戰沒丙申更定京城捕告強盜官賞制辛丑上京行省蒲察五斤表左監軍哥不孛誣防州宣撫副使紇石烈按敦將叛而殺之事下尚書省宰臣以爲按敦之死徐議卹典哥不孛亦姑牢籠使之上勉從其言夏四月壬寅朔蒲察五斤表遼東便宜阿里不孫貸糧高麗不應輒以兵掠其境上命五斤遣人以詔往諭高麗使知興兵非上國意乙巳詔河南路行總管府節鎮以上官充宣

差捕盜使以防禦刺史以上長貳官及世襲猛安之才武者爲之副又命濮王府尉完顏毛良虎爲宣差提控以巡督之是日曲赦遼東等路以戶部尚書夾谷必蘭爲翰林學士承旨權參知政事行省于遼東丁未承裔敗宋人于皂郊堡庚戌御史劾集賢院諮議官李維嶽本中山府無極縣進士趙孝選家奴乞正其事上曰國家用人奚擇貴賤命以官銀五十兩贖放爲良任使仍舊壬子遣侍御史完顏素蘭近侍局副使訛可同赴遼東察訪叛賊萬奴事體行省侯摯督兵復密州提控朱琛復高密縣癸丑完顏素蘭請宣諭高麗復開互市從之乙卯特賜武舉溫迪罕

繳住以下一百四十人及第丁巳陝西行省兵破宋雞公
山取和州成州至河池縣黑谷關守者皆遁前後獲糧九
萬斛錢數千萬軍實不可勝計戊午紅襖賊犯徐邳行樞
密院兵大破之己未阿里不孫自潼關之敗失其所在變
姓名匿居柘城爲御史覺察繫其家屬將窮治之乃遣子
上書詣吏待罪臺臣力請誅之以懲不忠上卒赦其罪諭
以自效癸亥遣重臣審理京師冤獄丁卯河南諸郡蝗臨
洮路報敗宋人之捷東平行省敗黑旗賊拔膠西縣渠賊
李全來援併破之戊辰河北行省敗紅襖賊進至密州降
僞將校數十人士卒七百人悉復其業五月辛未朔鳳翔

元帥完顏間山破宋人步落塌香爐堡諸屯甲戌招撫副使黃摑阿魯荅襲破李全于莒州及日照縣之南三道擊之追奔四十里丙子夏人自葭州入鄜延元帥承立遣兵敗之馬吉峰是日捷至詔遣官督捕河南諸路蝗辛巳策論詞賦經義進士及武舉人入見賜告命章服萊州民曲貴殺節度經略使內族轉奴自稱元帥構宋人據城叛山東招撫司遣提控王庭玉招撫副使黃摑阿魯荅等討平之斬僞統制白珍及牙校數十人生禽貴及僞節度使呂忠等十餘人誅之乃命庭玉保萊朱琛保密阿魯荅保寧海以安輯其民丙戌陝西行省言四月中鞏州行元帥承

喬遣提控烏古論長壽納蘭記僧分道伐宋長壽出鹽川
鎮記僧出鐵城堡皆克捷而還辛卯壽州行樞密院南城
軍攻辛城鎮一軍趣史河與宋人戰勝之壬辰河北行省
復黃縣乙未第鳳翔秦鞏三道南征將士功各遷其官丙
申增隨朝官及諸承應人俸戊戌陝西行省連報承裔等
入宋境之捷己亥

大元兵徇錦州元帥劉仲亨死之庚子陝州羣狼傷百餘
人立賞募人捕殺六月甲辰樞密院言諸道表稱

大元集兵應州飛狐將分道南下觀其意不在河北而在
陝西河東各路義士土兵蕃漢弓箭手宜於農隙教閱以

備緩急東平單州衝要豫徙其農民糧畜置可守之城修
近城水砦因以爲固潼谷遠連商號宜令兩帥府選官按
視阨塞又言賈瑀等刺殺苗道潤乞治瑀等專殺之罪餘
州郡各以正職授頭目使分治一方上諭之曰道潤之衆
亟收集之瑀等是非未明姑置勿問諸頭目各制一方利
害至重更審處之石州賊馮天羽衆數千據臨泉縣爲亂
帥府命將討捕之爲賊所敗旁郡縣將謀應之州刺史紇
石烈公順赴以兵天羽等數十人迎降公順殺之餘賊走
保積翠山遣將王九思攻之不下詔國史院編修官馬季
良持告勅金幣往招之比至九思先破柵殺賊二千人餘

復走險已而其黨安國用等詣季良降者五千餘人就署
國用同知孟州防禦使事以次遷擢有差分其衆于絳霍
間丁未以參知政事把胡魯權左副元帥與平章政事齊
鼎協力防秋己酉苗道潤所部軍請隸潞州元帥府詔河
北行省審處之壬子紅模賊犯沂州官軍敗之追至白里
港都提控齊信沒於陣有司議贈卹丙辰遣監察御史粘
割檢失往河中絳解等郡同守土官商度可保城池丁巳
上以久旱諭宰臣治京獄寃因及京城小民中納石炭既
給其價御史劾以過請官錢並繫之獄有論至極刑者欲
悉從寬宥何如高琪對不然遂止壬戌御史言戶部貧外

郎城伯昇供億息州偶遇官軍戰勝亦冒遷一官乞論其
罪上曰軍前如此者何止伯昇今遽見罪餘皆不安且詰
所從來勢連及帥府多故之秋豈爲一官遂志大計但令
釐正之癸亥遣高汝礪徒單思忠禱兩秋七月庚午朔日
有食之辛未詔賞南伐將士有差夏人犯龕谷提控夾谷
瑞及其副趙防擊走之甲戌以旱災詔中外已卯遣官望
祀嶽鎮海瀆于北郊享太廟祭太社太稷祭九宮貴神于
東郊以禱兩遣太子太保阿不罕德剛禮部尚書楊雲翼
分道審理冤獄癸未大雨太子親王百官表請御正殿復
常膳庚寅擇明幹官提控銓選無違失者與升擢令譯史

不任事者驗已歷俸月放滿別選能者甲午夏人復犯龕
谷夾谷瑞大破之用點檢承玄言遣官詣諸道選寄居守
闕丁憂官及親軍入仕才堪總兵者得一百六人付樞密
任使八月庚子朔江北行省以苗道潤軍隸涿州刺史李
鴈驢副以張甫張柔戊申勅親軍百戶以下授職待闕者
給本俸仍充役俟當赴任遣之己酉詔河北行省完顏震
進軍援山東招撫使田琢自今將士立功聽琢先賞以聞
大元遣木華里等帥步騎數萬自太和嶺徇河東乙卯
大元兵收代州辛酉棣州提控紇石烈醜漢討賊張聚大
破其衆復濱棣二州姦人李宜伏誅復禁北歸民渡河戊

辰

大元兵收隰州九月乙亥下太原府元帥左監軍兼知樞
府事烏古論德升死之丙戌諭皇太子曰軍務之速動關
機會悉從中覆則或稽緩自今有當亟行者先行後聞以
戶部尚書納合蒲刺都爲元帥右監軍行元帥府事于潞
州戊子置秦關等處九守禦使命完顏蒲察等分戍諸阨
議遷海州侯摯言不便止

大元兵徇汾州節度使兀顏訛出虎死之庚寅李全破密
州執招撫副使黃摑阿魯答同知節度使夾谷寺家奴辛
卯

大元兵下孝義縣乙未設隨處行六部官以京府節鎮長官充尚書次侍郎郎中貢外郎防刺長官侍郎次郎中貢外郎主事勾當官聽所屬任使州府官並充勸農事防刺長官及京府節鎮同知以下充副使丙申李全破壽光縣冬十月甲辰李全破鄒平縣戊申破臨朐縣己酉

大元兵徇絳潞壬子攻平陽提控郭用死之癸丑下平陽知府事權參知政事行尚書省李革及從坦死之甲寅權平定州刺史范鐸以棄城伏誅詔諸郡錄囚官凡坐軍期者皆奏讞山東路轉運副使兼同知沂州防禦使程戩及邳州副提控王汝霖等通宋人爲變伏誅宋人攻漣水縣

提控劉瑛敗之丁巳

大元兵攻澤州戊午尚書省言獲姦細叛亡率多僧道詔
沿邊諸州惟本處受度聽依舊居止來自河北山東遣入
內郡譏其出入己未李全據安丘提控王政屯昌樂侯王
庭玉兵同進討宣差太府少監伯德玩擅率政兵攻全爲
全所敗提控王顯死焉田琢上言乞正玩罪癸亥月犯軒
轅左角之少民星甲子詔河東北路忻代寧化東勝諸州
並受嵐州帥府節制十一月庚午大赦庚辰御登賢門召
致政舊臣賜食訪以時政得失辛巳以行元帥府紇石烈
桓端權簽樞密院事行院于徐州權右都監訛可行元帥

府事于息州甲申河東南路隰吉等州聽絳州元帥府節制

大元兵收潞州元帥右監軍納合蒲剌都參議官修起居注王良臣死之戊子龕谷提控夾谷瑞敗夏人于質孤堡河北行省報海州之捷壬辰定經兵州縣職官子孫非本貫理蔭及過期不蔭等格丙申

大元兵下太原之韓村砦定京師失火法十二月己亥朔以御史中丞完顏伯嘉權參知政事元帥左監軍行河中府尚書省元帥府控制河東南北路便宜從事升絳州爲晉安府總管河東南路兵降平陽爲散府辛丑簽樞密院

事蒲察移剌都伏誅壬寅前山東西路轉運使致仕移剌福僧上章言時事癸卯詔大理卿溫迪罕達權同簽樞密院事行院于許州甲辰以誅移剌都詔中外乙巳命徒單思忠祈雪已而大雪甲寅以開封府治中呂子羽等使宋講和紅襖賊攻彭城之胡村寨徐州兵討敗之乙卯以禮部侍郎抹撚胡魯剌爲汾陽軍節度使權元帥右監軍與嵐州元帥古里甲完復河東丁巳籍瀕河埽兵癸亥尚書省言樞密掌天下兵皇太子撫軍而諸道又設行院其有功及失律者須白院啓東宮至於奏可然後誅賞有司但奉行而已自今軍中號令關賞罰者皆明注詔旨教令毋

容軍司售其姦欺上從之以樞密副使駙馬都尉僕散安
貞爲左副元帥權參知政事行尚書省元帥府事伐宋甲
子上諭旨有司京師丐食死於祁寒朕甚憫之給以後苑
竹木令居獲煥所

三年春正月庚午呂子羽至淮宋人不納而還詔伐宋丙
子稅民種地畝議行均輸戊寅勅和市邊城軍需無至配
民定鎮戍征行軍官減資歷月日格壬午大雪上聞東掖
有撒瓦聲問左右知爲丁夫葺器物庫廡舍上惻然諭主
者曰雪寒役人不休可乎姑止之丙戌紇石烈牙吾塔上
濠州香山村之捷丁亥諭宣徽皇后生日免百官賀壬辰

以

大元兵已定太原河北事勢非復向日集百官議備禦長久之計伐宋捷至上謂侍臣曰此事豈得已哉近日遣使實欲講和彼既不從安得不用兵也免單丁民戶月輸軍需錢甲午有司請立價以買南征軍士所獲馬上恐失衆心因至敗事不聽乙未勅尚書省自今六部稟議常事但可再送不得趣召辨正餘應入法寺定斷而再送猶未當者具以聞下吏治之宰相執政以下皆不得召部寺官部寺官亦不得詣省犯者論違制丁酉鄧州元帥府提控婁室有罪減死削爵二月庚子上與太子謀南征帥不得其

人歎曰天下之廣緩急無可使者朕安得不憂紇石烈牙
吾塔敗宋人于滁甲辰胥鼎言軍中誅賞近制須聞朝廷
賞由中出示恩有歸可部分失律主將不得即治其罪不
可詔尚書樞密雜議宰臣請城守野戰將校有罪從七品
以下許便宜決罰餘悉奏裁上曰七品以下財令治之將
權太輕或至誤事自今四品以下聽決乙巳攻宋光山縣
俘其統制蔡從定等光州以兵來援復敗之丙午上謂宰
臣江淮之人號稱選悞然官軍攻蔓菁峒其衆困甚脅之
使降無一肯從者我家河朔州郡一遇北警往往出降此
何理也丁未勅凡立功將士有居喪者特起復遷授戊申

拔宋小江寨殺其統制王大蓬已酉取宋武休關庚戌元
帥右都監承立以綏德保安之境各獲夏人統軍司文移
來上其辭雖涉不遜而皆有保境息民之言詔尚書省議
之宰臣言鎮戎靈平等鎮近耗夏人數犯疆場此文正緩
我耳宜嚴備禦以破姦計上然其言又曰頃近侍還自陝
西謂白撒已得鳳州如得武休關將遂取蜀朕意殊不然
假令得之亦何可守此舉蓋爲宋人渝盟初豈貪其土地
耶朕重惜生靈惟和議早成爲佳耳高汝礪乞致事優詔
不允甲寅詔陝西行省從七品以下官許注擬有罪許決
罰丁憂待闋隨宜任使軍官徒以上罪及軍事怠慢者巡

按御史治之己未行省安貞入宋境破梁縣等軍擒統制
李申之右副元帥完顏賽不左都監牙吾塔白石關平山
砦之捷俱至三月丁卯朔陝西兵破宋虎頭關取興元洋
州捷至上大悅庚午破宋人于七口倉甲戌高麗先請朝
貢因遣使撫諭之使還表言道路不通俟平定後議通款
命行省姑示羈縻勿絕其好戊寅蔡州行元帥府右都監
完顏合達破宋人于海林關擒統制張時已卯長春節免
朝賀提控奧屯吾里不敗宋人于上津縣軍還至濠州宋
人來拒牙吾塔擊走之乙酉河南路節鎮以上立軍器庫
設使副各一員防刺郡設都監同監各一員完顏合達敗

宋人于馬嶺堡丙戌行省安貞破宋人于石壩山己丑追
賜皇后父太尉汴國公彥昌姓溫敦庚寅攻宋麻城縣拔
之獲其令張倜等辛卯行省安貞破宋兵于塗山壬辰賽
不敗宋兵于老口鎮又敗宋人于石鵲崖甲午錄用罪廢
官副元帥蒲察阿里不孫御史大夫永錫等七十人詔大
原等路州縣闕正授官令民推其所愛爲長從行省量與
職任及運解鹽入陝西以濟調度命胥鼎兼領其事閏三
月丙申朔申明屠宰牛罪律以雄霸以東付權中都經略
李禰驢易州以西付權中都西路經略靖安民治之遙授
金安軍節度使完顏和尚故行軍副提控夾古吾典皆除

名庚子皇子平章政事濮王守純進封英王壬寅叛賊王
公喜構宋人取沂州甲辰以沂國公主薨輟朝丙午給空
名宣勅及金銀符付嵐州帥古里甲許便宜遷注以招脅
從丁未諭樞密院議晉安東平河中諸郡備兵之策庚戌
行省左副元帥僕散安貞至自軍前入見于仁安殿辛亥
少府少監粘割梭失言利害七事甲寅以南伐師還罷南
邊州郡籍民爲兵者戊午夏人破葭州之通泰砦刺史純
石烈王家奴戰沒壬戌治書侍御史蒲魯虎上書請選太
子師傅甲子胥鼎等各遷官賞南伐之功夏四月丙寅朔
裕宿等州置元帥府選陝西步騎精銳六千人實京兆戊

辰選精銳六萬分屯平涼涇邠乾耀等州庚午以秦州防禦使女奚烈古里間行元帥府于平涼罷募民運解鹽築京師裏城命侯摯董役高琪總監之甲戌以知臨洮府事石璽合喜爲元帥左都監行元帥府事于鞏州壬午遣近侍四人巡視築城丁夫時其飲食聽其更休督吏慘酷悉禁止之癸未陝西黑風晝起有聲如雷地大震甲申詔河北州縣官止令土著推其所愛者充朝廷已授者別議任使乙酉夏人據通秦寨提控納合買住擊敗之己丑林州都統霍成以疑貳誣殺降人論罪當死元帥惟良不欲以殺敵人誅邊將請寬其罰仍請立護送降民賞格以杜後

患上爲之赦成而命有司班賞格焉護送十人以上至者
遷一官不及者每名賞錢二百緡五十人以上兩官百人
以上兩官雜班任使庚寅以時暑詔朝臣四日一奏事高
汝礪請備防秋之糧宜及年豐於河南州郡驗直立式募
民入粟上與議定其法而行之同提舉權貨司王三錫請
權油歲可入銀數萬兩高琪主之衆以爲不便遂止辛卯
夏人犯通秦砦元帥完顏合達出兵安塞堡以擣其巢至
隆州夏人逆戰官軍擊之衆潰進薄城俄陷其西南偶會
日暮還壬辰以同知平陽府事胡天作充便宜招撫使五
月乙未朔鳳翔元帥府遣兵敗宋人于黃牛等堡壬子太

白晝見于參六月甲子朔時暑給修城夫病者藥餌遣諭
元帥合達曰以卿幹局故有唐鄧之委或有侵軼戰退不
宜遠追第固吾圉以驃騎上將軍河南路統軍使石盞女
魯歡為元帥右都監行平涼元帥府事詔赴遼東等處行
省金銀符及空名宣勅聽便宜處置壬申制汾河戍兵逃
亡罪並同征行軍人例詔御史中丞完顏伯嘉行樞密院
于許州甲戌定防秋將校擊毬飲燕之罰李全寇日照博
興訖石烈萬奴敗之寇即黑完顏僧壽又敗之復萊州戊
寅詔陝西簽軍如河南例曲赦河東南北路丁亥命防禦
使徒單福定等帥所部義軍與沂州民老幼盡徙于邳戊

子遼州總領提控唐括狗兒帥師復太原府平涼等處地
震詔右司諫郭著撫諭其軍民秋七月丁酉籍邳海等州
義軍及脅從歸國而充軍者人給地三十畝有力者五十
畝仍蠲差稅日支糧二升號決勝軍戊戌上進樞密臣僚
諭之曰裏城久未畢功尚書欲增調民朕慮妨農况糧儲
不繼將若之何蓋改圖之樞臣言是役之興實爲大計今
功已過半偶值霖潦成功差遲尚書議增丁夫勢必驗口
不令妨業比及防秋當告成矣上曰卿等善爲計畫無貽
朕憂庚子以地震曲赦陝西路甲辰置東西南三路行三
司乙卯曲赦山東西路丁巳遣徒單思忠以地震祭地祇

于上清宮八月丙寅補闕許古等削官解職丁卯木星犯
輿鬼東南星戊辰遣禮部尚書楊雲翼祭社稷翰林侍讀
學士趙秉文祭后土于河中府西京行三司李復亨言汝
鄧治鐵河南北食鹽之利木星晝見于柳百有九日乃滅
壬申上勅臺臣朕處分尚書事或至數日不奉行及拜問
則巧飾次第以對大臣容有遺忘左右司玩弛臺臣當糾
今後復爾併罪卿等乃定御史上下半月勾檢省中制勅
文字

大元兵下武州軍事判官郭秀死之丁丑緩在京差徭中
山治中王善殺權知府事李仲等以叛

大元兵下合河縣縣令喬天翼等死之乙酉命樞密遣官
簡嶺外諸軍之武健者養之彰德邢洛衛濟懷孟等城弱
者罷遣戊子勅侯摯諭三司行部官勸民種麥無種粒者
貸之九月甲午詔單州經略使完顏仲屯宿州與右都監
紇石烈德同行帥府事丙申唐州從宜夾谷天成敗宋人
于桐栢丁酉尚書省請申命侯摯廣營積貯上不許曰徵
歛已多今更規畫不過復取於民耳防秋稍緩當量減戍
兵用度幸足何至是耶甲辰

大元兵徇東勝州節度使伯德密哥死之庚戌命行省胥
鼎領兵赴河中壬子真定招撫使武仙請給金銀符賞有

功從之。汭河造戰艦付行院帥府。冬十月癸亥朔定保舉縣令能否升黜舉主制。乙丑用蒙古綱言招集義軍各置都統副統等官。如貞祐三年制。平涼府先以地震被命醮祭。方行事慶雲見以圖來上。遣官覆驗得實。是日百官奉表稱賀。丁卯以完顏開權元帥左都監郭文振權右都監並行元帥府事。謀復太原。壬申定賊吏計罪以銀爲則。癸酉以慶雲遣官告太廟。甲戌以慶雲詔國內。己卯

大元兵次單州境。詔諸路民應遷避兵而不欲者。亟遣人以利害曉之。癸未裏城畢工。百官稱賀。宴宰臣便殿。遷右丞摯官一階。賜右丞相琪左丞汝礪參知政事思忠金鼎。

各一重幣三是役上慮擾民募人能致甓五十萬者遷一官百萬仍升一等平陽判官完顏阿剌左廂譏察霍定和發宋蔡京故居得二百萬有奇准格遷賞甲申宰臣請以裏城之功建碑會朝門從之丁亥

大元兵屯綿上壬辰命有司葺間舍給薪米以濟貧民期明年二月罷俟時平則贍之以爲常十一月癸巳朔前嵐州倉使張祐自夏國來歸以樞密副使僕散安貞同簽院事訛可行院事于河北乙未以官驢借朝士之無馬者乘之仍給芻豆己亥

大元兵徇彰德府辛丑詔朝官七品外路六品以上官二

歲舉縣令一人戶部令史蘇唐催租封丘期限迫促民有
生刈禾輸租者上聞之遣吏按問杖唐五十縣令高希隆
減二等尚書以希隆罰輕上曰使臣至外路自非至剛者
孰能不從其依前詔甲寅徐州總領納合六哥大破紅襖
賊于狄山禮部郎中抹熬胡魯刺上疏言時事丁巳右丞
相高琪下獄泰安軍副使張天翼爲賊張林所執以歸宋
繫之楚州至是逃歸授睢州刺史超兩官進職一等戊午
大元兵平晉安府行元帥府事工部尚書粘割貞死之十
二月誅高琪

本紀第十五終

本紀第十六

金史十六

開禧同司上請繼國事前中書丞相驤 國嶺 經筵都總裁 脫脫 奉

勅修

宣宗下

四年春正月壬辰朔詔免朝丙申金安軍節度使行元帥府事古里甲石倫除名丁酉

大元兵下好義堡霍州刺史移刺阿里合等死之詔贈官有差庚戌宋步騎十餘萬圍鄧州聞援軍至夜焚營去招撫副使术虎移刺答追及之奪其俘還壬子晝晦有頃大雷電雨以風癸丑戶部侍郎張師魯上書請遣騎兵數千

及春淮蜀並進以撓宋丙辰以武仙遙領中京留守進官
一階三月辛丑議遷睢州治書侍御史蒲魯虎奉詔相視
京東城池還言勿遷便乃止癸卯長春節詔免朝乙巳林
州元帥惟良擒叛人單仲李俊誅之降其黨盧廣己酉以
吏部尚書李復亨參知政事南京兵馬使朮甲賽也行懷
孟帥府事辛亥進平章政事高汝礪爲尚書右丞相監修
國史封壽國公參知政事李復亨兼修國史平章政事陝
西行尚書省胥鼎進封溫國公致仕壬子紅襖賊于忙兒
襲據海州經略使完顏陳兒以兵擊敗忙兒復取之甲寅
木星犯鬼宿積尸氣夏四月庚申朔詔御史中丞完顏伯

嘉提控防城事癸亥安武軍節度使柴茂破紅襖賊于棗
強祁州經略使段增順破叛賊甄全于唐縣夏人犯邊元
帥石盞合喜破之乙丑以彰德衛輝滑濬諸州隸河南路
轉運司以河南路轉運司爲都轉運視中都增置官吏戊
辰掃于太廟

大元遣趙瑞以兵攻孟州提控魯德王安復大名府以參
知政事把胡魯權尚書右丞左副元帥元帥左都監承立
爲右監軍權參知政事同行尚書省元帥府于京兆庚辰
東平元帥府總領提控蒲察山兒破紅襖賊于聊城壬午
命六部換法以法狀親白部官聽其面議大理寺如之五

月壬辰定二品至三品立功遷官格癸巳紅襖賊寇樂陵
監山橫海節度使王福連擊敗之張聚來寇又敗之甲午
上擊綽于臨武殿丙申以時暑免常朝四日一奏事丁酉
諭工部暑月停工役癸卯

大元兵徇陳州丙辰

大元兵徇兗州泰定軍節度使兀顏畏可死之六月丙寅
遣人招張柔丁卯詔減監察御史四員戊辰山東民僑居
者募壯士五百人益東莒公燕寧軍月犯土星己巳太白
晝見于張百八十有四日乃伏甲戌制諸倉場庫院巡護
軍受提舉倉場司及監支納官彈壓京歲不雨勅有司閱

獄雜犯死罪以下皆釋之丁丑

大元遣楊在攻下大名又攻開州及東明長垣等縣己卯
祈雨庚辰宋人方子忻來歸有司處之鄭州上曰吾民奔
宋者彼剝衣食之彼來歸者不善視之或復逃歸漏泄機事
命增子忻廩給有司優遇之元帥右監軍權參知政事承
立上封事秋七月辛卯宋人及紅襖賊犯河朔諸郡皆降
獨滄州經略使王福固守會益都賊張林來攻福乃叛降
林帥府請討之是日兩癸丑林州行元帥府遣總領嚴祿
等討紅襖賊于彰德府生擒偽安撫使王九詔參知政事
李復亨爲宣慰使御史中丞完顏伯嘉副之循行郡縣劾

農以烏古論仲端等使

大元八月戊午朔嚴實成江王贊據濟南山東招撫高居
實遣人招嚴實于青崖砦獲其款以聞李全犯東平府監
軍王庭玉敗之擒其僞安化軍節度使張林庚申高陽公
張甫請增兵守冀州上諭樞密穎州民渡淮爲宋軍者凡
十村可追索主者懲一二以誡其餘庚午勅掌兵官不聽
舉縣令夏人陷會州刺史烏古論世顯降甲戌陝西行省
報龍谷敗夏人之捷乙亥上諭宰臣河南水菑唐鄧尤甚
其被菑州縣已除其租餘順成之方止責正供和糴雜徵
並免仍自今歲九月始傳周歲桑皮故紙折輸流民佃荒

田者如上優免丙子陝西行省與夏人議和戊寅定選補親軍法己卯罷葭州招撫司壬午陝西路行省承裔報定西州之捷丙戌以隨路諸軍戶徙河南京東西南路各設檢察使副恒山公武仙降

大元九月戊子詔遣官于河南陝西選親軍辛卯進章宗實錄戊戌

大元木華里屯軍真定置總領元帥府于歸德以壽州陳留兩鎮兵屬之庚子夏人入定西州壬寅宋人屯皂郊堡行軍提控完顏益都擊敗之

大元遣塔忽等來癸卯夏人來侵甲辰滕州招捕提控夏

義勇討紅襖賊敗之乙巳詔參知政事李復亨提控芻糧
事己酉夏人陷西寧州尚書省都事僕散奴失不坐誅駙
烏都尉徒單壽春奪官一階杖六十癸丑更定安泊逃亡
出征軍人罪及捕獲賞格甲寅宋人出秦州及夏人來侵
丙辰鞏州行元帥府事石盪合喜報定西州之捷冬十月
壬戌

大元遣蒙古塔忽訛里刺等來己卯陝西東路行省報綏
德州之捷泗州元帥府言紅襖賊一月四入寇掠人畜而
去庚辰上擊鞠于臨武殿辛巳授紅襖賊時青滕陽公本
憂兵馬總領元帥兼宣撫癸未京西山寨各設守禦使副

令本路帥府總之諭陝西行省圖復會州上擊鞠于臨武
殿十一月丁亥朔免越王永功朔望朝參易水公靖安民
爲其下所殺戊子黃陵岡經略使烏古論石虎等以戰陣
失律伏誅壬辰木星晝見于翼積六十有七日伏夜又犯
靈臺第一星甲午河南水遣官勸課更浮山縣名忠孝戊
戌詔復衛紹王王爵仍加開府儀同三司壬寅山東東路
軍戶徙許州命行東平總管府治之判官一人分司臨潁
乙巳詔柴茂權元帥左都監蓋仁貴攝右都監同行元帥
府于真定是月

大元本華里國王以兵圍東平十二月甲戌祈雪禮部郎

中權左司諫抹撚胡魯刺上封事戊寅詔軍官許月擊鞠者三次以習武事庚辰臘享于太廟乙酉鎮南軍節度使溫迪罕思敬上書言錢幣稅賦二事

五年春正月丙戌朔免朝丁亥世宗忌日謁奠于啓慶宮戊子括南京諸州逋戶舊耕官田給軍戶壬辰議禦西夏及征南事諭皇太子以東平禦敵方略甲午諭樞密院南伐事重當詳議其便撰故衛王事跡如海陵庶人例丁酉大元兵攻天井關戊戌宋人襲泗州西城提控王祿死之辛丑太白晝見于牛二百三十有二日伏乙巳詔諸道兵集蔡州己酉伐宋庚戌山東行省報東平之捷二月丙辰

朔置招撫司于單州曲赦東平府庚申下詔伐宋以內族
惟弼權同簽樞密院事行院于中京幹勅合打權元帥府
右都監行元帥府于蔡息納合降福權簽樞密院事行院
于宿州李木魯達阿權元帥右都監完顏訛論副右都監
行元帥府于唐鄧戊辰罷懷州行元帥府復置招撫司與
孟州經略司並受中京行樞密院節制辛未僕散安貞以
兵出息州破宋人于淨居山寺拔黃土關癸酉以旱災曲
赦河南路丙子禁京城兵器元帥紇石烈牙吾塔破宋兵
復泗州進逼濠州至渦口乏糧而還西城癸未以旱災詔
中外三月丙戌朔上御仁安殿祈雨仍望祭于北郊庚寅

宋人圍唐鄧行元帥府事完顏訛論力戰却之前鄧州千戶李木魯毛良虎自拔歸國訛論便宜遷其官三階授同知唐州事乞正授以示信從之乙未罷河南路行三司丙申參知政事徒單思忠進尚書右丞兼修國史以太子詹事僕散毅夫爲參知政事諭宰臣曰今奉御奉職多不留心采訪外事聞章宗時近侍人秩滿以所采事定升降令亦宜預爲攷覈之法以激勸之戊戌長春節免朝己亥夏因叛人寶趙兒之招入據來羗城李木魯合住以重賞誘脅從人爲內應督兵急攻城拔之省試經義進士考官於常額外多放喬松等十餘人有司奏請駁放上已允尋復

遣諭松等曰汝等中選而復黜不能無動于心方今久旱
恐傷和氣今特恩放汝矣庚子賜林州行元帥府經歷官
康琚進士及第琚以武階乞赴廷試故有是命丙午以旱
築壇祀雷雨師壬子兩四月己未山東行省蒙古綱言東
莒公燕寧戰敗而死寧所居天勝砦據險寧亡衆無所歸
變在朝夕權署其提控孫邦佐爲招撫使黃摠元也爲總
領以撫其衆遣使請命勅有司議之辛酉禱雨于太廟丙
寅僕散安貞破宋黃蘄等州壬申俘宋宗室男女七十餘
口獻于京師癸酉詔親軍中武舉第而授職需次者仍執
舊役廩給循常闕至發遣辛巳監察御史劉從益以彈劾

失當奪官一階罷之詔定進士中下甲及監官散階至明
威者舉充縣令法五月甲申朔日有食之戊戌宋人據楚
丘官軍復之庚子納蘭記僧伏誅告人趙銳升職四等壬
寅陝西元帥完顏賽不遣使來獻晉安平陽之捷方議其
賞御史烏古論胡魯劾其縱將士鹵掠不副主上除亂拯
民之意乞正其罪上以賽不有功詔勿問賞議亦寢癸卯
唐州守將訛論爲元帥賽不猶子與宋人戰唐州境上爲
宋人所敗死者七百餘人匿之而以捷聞御史納蘭發其
事上以賽不故亦不之罪而以是意諭之乃稱納蘭敢言
錄其功付有司秩滿考最癸丑東平內徙命蒙古綱行省

于邳州王庭玉行帥府于黃陵壩六月甲寅朔尚書省奏
駙馬都尉安貞反狀上閱奏慮其不實謂平章政事英王
守純曰國家誅一大臣必合天下後世公議其令覆按之
乙丑遣使諭晉陽公郭文振上黨公完顏開各守疆土同
心濟難毋以細故啓釁端誤國事戊寅僕散安貞坐謀反
并其三子皆伏誅己卯越王求功薨庚辰輟朝壬午上親
奠于殯所秋七月己亥義勇軍叛據碭山縣庚子詔增給
徐州清口等處戍兵衣糧己酉碭山賊夜襲永城縣行軍
副總領高琬敗之命蒙古綱併力討捕辛亥單州招撫劉
瓊乞移河南糧濟其軍詔給之八月壬子朔罷黃陵壩招

撫司上諭尚書省礪山叛軍家屬囚歸德旬餘不給糧恐傷其生宰臣奏已給之矣又諭樞密河北艱食民欲南來者日益多速令渡之母致殍死癸亥林懷帥府邀擊紅襖賊于伏恩村敗之甲子詔南征潰軍復歸而能力戰者依出界立功格賞之乙丑宋人掠沈丘殺縣令甲戌命有司除逋戶負租毋徵見戶九月甲申以京東歲饑多盜遣御史大夫訖石烈胡失門爲宣慰使往撫安之更定監察御史違犯的決法丁亥詔州府及軍官捕盜慢職四品以下宣慰使決之三品以上奏裁戊子增授隰州招撫使軒成官改受西省節制乙巳崇進駙馬都尉定國公徒單公弼

堯庚戌歲星犯左執法右丞相高汝礪表乞致仕詔溫留
之冬十月癸丑進汝礪官榮祿大夫命僕散毅夫行尚書
省于京東督諸軍芻糧乙卯太醫侯濟張子英治皇孫疾
用藥瞋眩皇孫不能任遂不療罪當死上曰濟等所犯誠
宜死然在諸叔及弟兄之子便應准法行之以朕孫故殺
人所不忍也命杖七十除名尚書省言司縣官貪暴不法
部民逃亡既有決罰他縣停匿亦宜定罪隨處土民久困
徭役客戶販鬻坐獲厚利官無所斂亦宜稍及客戶以寬
土民行院帥府幕職雖無部衆亦嘗贊畫戎功而推賞止
進官一階宜聽主將保奏第功行賞上皆從其請戊午遣

親軍討河南群盜辛酉

大元兵攻綏德州壬戌夏人復侵龔谷甲子勅監察所彈
事同列不可預聞著爲令丁卯夏人犯定西積石之境戊
寅分京畿戍卒萬二千河中民兵八千以許州元帥紇石
烈鶴壽將之屯潼關西十一月癸未陝西東路行省報安
塞堡敗夏人之捷甲申諭太府減損食品庚寅募民興南
陽水田壬辰太子親王百官表賀安塞堡之捷却之乙未
夏人攻龔谷宋人攻蘄縣紅襖賊掠宿州辛丑詔蠲徐邳
宿泗等州逋租官民有能墾闢閒田除來年科徵歸德毫
壽潁停閣逋戶租外仍蠲三之一逋戶田廬有司募民承

業禁其毀損以俟來復蒲城縣民李文秀等謀反伏誅壬寅宋人焚潁州執防禦判官而去是日相國寺火

大元兵攻延安十二月辛亥朔以

大元兵下潼關京兆詔省院議之壬子罷辟舉縣令法丁巳禮部侍郎烏古孫仲端翰林待制安庭珍使北還各遷一階庚申罷河南義軍丁卯詔罷新簽民軍減樞密院掌兵官及京城戍兵仍諭行院帥府毋擅增設補簽辛未罷行總管府及招討統軍檢察等司定宋人來歸賞格及詐誘征防軍人逃亡罪法癸酉元帥合達買住及其將士以延安功特賞賚之仍下詔獎諭閏月辛巳朔

大元兵徇鄜州保大軍節度使完顏六斤權元帥左都監
紇石烈鶴壽右都監蒲察婁室遙授金安軍節度使女奚
烈資祿皆死之乙酉提控術甲咬住破沈丘賊于陳瓦丙
戌頒詔撫諭河南土寇戊子熒惑犯軒轅己丑孫瑤及捕
盜官吾古出招降泰和縣賊二千人詔斬其首惡餘皆釋
之同知保靜軍節度使郭澍以徵糧失期誣殺平民坐誅
辛卯官軍復葭州癸巳通遠軍節度使李木魯合住削官
甲午月犯熒惑丙申紅襖賊夜入蒙城縣縣官失其符印
軍民死者甚衆賊大掠而去戊戌鎮星晝見于軫己亥發
兵捕京東盜太白晝見于室壬寅發上林署粟賑貧民陳

毫等州鹿邑城父諸縣盜竄起趣樞府遣官討之捕盜軍所過殘民遣御史一人按視軍所獲牛有司以官錢收贖戊申詔定招捕土寇官賞格已酉更造興定寶泉每一貫當通寶四百貫

元光元年春正月庚戌朔免朝辛亥世宗忌辰謁奠于啓慶宮元帥惟弼破紅襖賊于張騫店壬子遣官墾種京東西南三路水田甲寅禁非邊關急速事無馳傳卽濫乘者州縣徑白省部四方館從御史臺外路從分按御史治之詔陝西西路行省徙京兆者兵退還治平涼防州刺史把移失刺以棄城伏誅鄭州防禦使裴滿羊哥同知防禦使

古里甲石倫除名平西節度使把古咬住奪官一階丁卯
詔撫諭京東百姓壬午詔徙中京唐鄧商號許陝等州屯
軍及諸軍家屬赴京兆同華就糧屯二月乙酉陝西西路
行省請以厚賞募河西諸蕃部族寺僧圖復大通城命行
省樞密院籌之癸巳上諭宰臣宋人以重兵攻平興褒信
我師力戰却之又偵知其事狀之詳若俟帥府上功推賞
豈急於勸獎之道其遣清望官齎空名宣勅覈實給之乙
未詔諭河南陝西

大元兵屯葭州壬寅權定行省樞府元帥府輒杖左右司
經歷司官罪法甲辰上念鄜延被兵又延安受圍嘗發民

粟給軍詔除延安廊坊丹葭綏德稅租仍令有司償其粟
直不足者許補官戊申恒州軍變萬戶呼延棫等千餘人
殺掠城中焚廬舍而去己酉遣元帥左監軍訛可行元帥
府事節制三路軍馬伐宋同簽樞密院事時全行院事副
之三月辛酉宋人掠確山縣之劉村丙寅歲星犯太微左
執法戊辰樞密院委差官賈天安上書言利害壬申尚書
右丞徒單思忠以病馬輸官冒取高價御史劾之有司以
監主自盜論死上顧惜大體降授陳州防禦使癸酉提控
李師林敗夏人于永木嶺郭文振表近得俘者言南北合
兵將攻河南陝西詔樞密備禦夏四月辛巳以金吾衛上

將軍勸農使訛可簽樞密院事置大司農司設大司農卿
少卿丞京東西南三路置行司並兼採訪事壬午

大元兵攻陵川縣丁酉林懷路行元帥府事惟良削官西
階罷之更定辟舉縣令之法而復行之戊戌籍丁憂待闕
追殿等官備防秋丁未行樞密院報淮南之捷五月戊申
朔

大元兵屯隰吉翼等州壬戌訛可時全軍大敗甲子訛可
以敗績當死上面數而責之勉其後效命賸官兩階丁卯
召致政胥鼎等赴省議利害壬申時全伏誅六月戊寅朔
造舟運陝西糧由大慶關渡抵湖城癸未大赦陳州防禦

使呂子羽坐乏軍興自盡制諸監管及八品以下職事丁憂待闋任滿選授者試補侍衛親軍命各路司農司設捕盜方略丁酉紅襖賊掠柳子鎮驅百姓及驛馬而去提控張瑀追擊奪所掠還僞監軍王二據黎陽縣提控王泉討之復其城秋七月庚戌

大元將按察兒以其眾屯晉安冀州之境丙辰上黨公完顏開復澤州己未歸德行樞密院王庭玉報曹州破紅襖賊之捷庚申定監當官選法河北群盜犯封丘開封界令樞密院禦捕甲子京東總帥紇石烈牙吾塔請自今行院帥府幕職有過得自決之不允戊辰紅襖賊襲徐州之十

八里砦又襲古城桃園官軍破之乙亥太白晝見經天與日爭光八月丁丑定西征將士官賞有差己卯彗星見西方甲申增定藏匿逃亡親軍罪及告捕賞格積石州蕃族叛附于夏鞏州提控尼庵古三郎討之獲羊千口進尚膳詔却之以彗星見改元大赦諭旨宰臣曰赦書已頒時刻之間人命所係其令將命者速往計期而至以大司農把胡魯爲參知政事癸巳河間公移刺衆家奴高陽公張甫兵復河間府是日報捷者始達上以道途梗塞報者艱虞命厚賞之夏人入德順壬寅祈雨九月丙午朔以左右警巡使兼彈壓諭陝西行省備邊壬子牙吾塔請以兵由壽

州渡淮擣宋人巢穴不從乙卯議經略淮南己巳宋人掠遂平縣之石砦店復侵南陽唐州提控夾谷九住敗之冬十月丁丑夏人掠德順之神林堡壬午宋張惠攻零子鎮爲幹魯朶所敗虜其裨將二人河中府萬戶孫仲威執其安撫使阿不罕胡魯剌據城叛陝西行省遣將討平之癸未復曹州甲申上獵于近郊詔免百官送迎且勿令治道以勞百姓庚寅徙彰德招撫使杜先軍於衛州乙未大元兵下榮州之胡壁堡及臨晉庚子詔所司巡護避兵民資產甲辰以京兆官民避兵南山者多至百萬詔兼同知府事完顏霆等安撫其衆十一月丁未

大元兵徇同州定國軍節度使李復亨同知定國軍節度使訛可皆自盡甲寅京東總帥牙吾塔報臨淮破宋兵之捷戊辰

大元蒙古蒲花攻鳳翔府十二月乙亥朔上謂皇太子曰吾嘗夜思天下事必索燭以記明而即行汝亦當然以河中治中疾小叔權元帥元帥右都監便宜行事乙酉遷同知平陽府事史詠龍虎衛上將軍賜號守節忠臣權行平陽公府事丁亥疊州總管青宜可卒特命其子角襲職詔諭近侍局官曰奉御奉職皆少年不知書朕憶曩時置說書人日爲講論自古君臣父子之教使知所以事上者其

復置已丑蘭州提控唐括昉敗夏人于質孤堡

大元以大軍攻鳳翔

二年春正月甲辰朔詔免朝賀乙巳世宗忌日謁奠于啓慶宮右丞相汝礪乞致政上面諭使留

大元兵下河中府權元帥右都監侯小叔復之壬子壽州防禦使完顏乃剌奪官四階甲寅上諭宰臣曰向有人言便宜事卿等屢奏乞作中旨行之帝王從諫足矣豈可掠人之美以爲己出哉戊午四方館使李膺驢以罪罷宰臣請以散地羈縻之上曰此輩豪傑正須誠待若以術制適使自疑但不畀軍政外補何害授膺驢恒州刺史又謂膺

爵恩例有丁憂官得起復者是教人以不孝也何爲著此
令哉丁卯

大元兵復下河中府二月甲戌朔皇后生辰詔免賀禮己
卯丞相汝礪朝會免拜設榻殿下久立賜休壬午詔軍官
犯罪舊制更不任用今多故之秋人才難得朕欲除大罪
外徒刑追配有武藝善掌兵者量才復用其令尚書省議
以聞丁亥大赦己亥鳳翔圍解石盩合喜加金紫光祿大
夫升左監軍特授大名府海谷忽申猛安完顏仲元加光
祿大夫升右監軍特授河北東路洮安必刺猛安各賜金
釐帶有差三月甲辰朔宋人襲汝陽壬子誠諭平章英王

守純崇飲癸丑以河中府推官籍阿外權元帥右都監代
領侯小叔軍甲寅上謂宰臣人有才堪任事其心不正者
終不足貴丞相汝礪對曰其心不正而濟之以才所謂虎
而翼者也雖古聖人亦未易知上以爲然丙辰長春節免
朝以戶部尚書石盞畏忻爲參知政事兼修國史辛酉禁
茶壬戌詔以鳳翔戰功及頒賞等級徧諭諸郡甲子以完
顏伯嘉權參知政事行尚書省于河中府辛未詔職官犯
罪非死罪除名遇赦幸免有才幹者中外並用夏四月癸
酉朔復霍州汾西縣詔給空名宣勅遷賞將士之有功者
丙子設京兆南山安撫司丁丑故鳳翔萬戶完顏醜和以

死節贈懷遠大將軍授刺史職其父恕除以功例賞外遷
兩官升職二等己卯遣官閱河南帥府見兵籍開官豪右
親丁及遼東河北客戶爲軍庚子募西山獵戶爲軍五月
癸卯朔始造元光重寶丙午復河中府及榮州遣人持檄
招前恒山公武仙乙卯權平陽公史詠復霍州及洪洞縣
丁巳始造元光珍貨同銀行用戊午以檄招東平嚴實己
未叅知政事毅夫言脅從人號忠孝軍而置汾淮者所爲
多不法請防閑之上曰人心無常顧馭之何如耳馭之有
術遠方猶且聽命況此輩乎不然雖左右亦難防閑正在
廓開大度而已若是而不能致太平者命也庚申簽河南

路寄居官民充軍辛酉徙晉陽公郭文振兵于孟州甲子
徙權平陽公史詠兵于解州河中府六月乙亥京東總帥
報淮南之捷丁亥罷行省所置監察御史兼彈壓之職戊
子議遣人招李全嚴實張林甲午詔罷河中行省置元帥
府辛丑遙授靜難軍節度使顏盪蝦蟆等以保鳳翔功進
官秋七月壬寅朔夏人犯積石州羌界寺族多陷沒惟桑
逋寺僧看逋昭逋廝沒及答那寺僧奔鞠等拒而不從詔
賞諸僧鈐轄正將等官而給以廩祿乙巳遣兵守衛解州
鹽池庚戌以空名宣勅遷賞諸部降人壬子除市易用銀
及銀與寶泉私相易之禁癸丑勅諸御史曰瑣細事非人

主所宜詰然凡涉姦弊靡不有關國政者比聞朝官及承
應人月給俸糧多雜糠土有司所收曷嘗有是物哉至于
出納斗斛亦小大不一此皆理所不容者而臺官初不問
事事須朕言之安用汝曹也乙卯丹鳳門壞丁巳陰坡族
之骨鞠門等叛歸夏元帥夾谷瑞發兵討之以捷聞御史
中丞師安石言制敵二事戊午宰臣方對次有司奏前奉
御溫敦太平卒上大駭曰朕屢欲授太平一職每以事阻
今僅授之未數日而亡豈非天耶因謂宰臣曰海陵時有
護衛二人私語一曰富貴在天一曰由君所賜海陵竊聞
之詔授言由君所賜者以五品職意謂誠由己也而其人

以疾竟不及授章宗秋

聞平章張萬公薨歎曰朕廻將

拜萬公丞相而遂不起命也乙丑詔籍陝西路僑居官民
爲軍八月辛未朔邳州從宜經略使納合六哥等率都統
金山顏俊以沂州百餘人畏入省署殺行尚書省蒙古綱
據州反壬申詔賞京兆路官軍保全南山諸谷之功以所
全人數多寡爲等第千人以上官一階三千人以上兩階
五千人以上三階仍升職一等能以力戰護之者又增一
階戰沒者就以贈之甲戌遣官持空名宣敕諭以重賞招
納合六哥拒命即命牙吾塔合行院兵討滅之乙亥火星
入鬼宿中掩積尸氣乙酉詔能捕獲反賊六哥者除見定

官外仍與世襲謀克丙戌遣官分行蔡息陳臺等縣諸
州洎司農司州縣吏同議凡民丁相聚立砦避兵與舊巡
檢軍相依者五十戶以上置砦長一員百戶增副一員仍
先遷一官能安民弭盜勸農者論功注授九月庚子朔日
有食之宋人入壽州女奚烈蒲乃力戰却之壬寅樞密院
奏提控木甲剋只罕破宋人之功甲辰宋人攻南陽丙午
牙吾塔報桃園淮陽之捷并以納合六斤結構李全之狀
來告戊申降人孫邦佐自李全軍中歸遣授知東平府兼
山東西路兵馬都總管宣軍與宋人力戰于胡陂而却之
提控木虎春兒爲所殺癸丑納合六斤所署僞都統烏古

論賽漢夾谷留住等來歸己未贈木虎春兒銀青榮祿大
夫丙寅扎也胡魯等拔邳州南城丁卯權御史中丞師安
石等劾英王守純不實付有司鞠治尋詔免罪而猶責諭
之冬十月癸酉徙晉陽公郭文振等兵于衛州乙亥制行
樞密院及元帥府農隙之月分番巡徼校獵月不過三次
丁丑上獵于近郊己卯拾于太廟壬午火星犯靈臺乙酉
上獵于近郊辛卯詔石壕店汚池永寧縣各屯兵千人壬
辰滕州人時明謀反伏誅戊戌唐鄧行元帥報淮南之捷
十一月己亥紅襖賊偽監軍徐福等來降詔進牙吾塔官
一階賜金幣有差辛丑總帥牙吾塔報邳州之捷函叛人

六哥首以獻開封縣境有虎噬人詔親軍百人射殺之賞射獲者銀二十兩而以內府藥賜傷者丙午邳州紅襖賊三千來降初擬置諸陳許之間上以爲若輩雖降家屬尚在河朔餘黨必殺之所得者寡而被害者衆亦復安忍不若命使撫諭加以官賞而遣之還果忠於我雖處河朔豈負我耶且餘衆感恩將有效順者矣戊午以上黨公完顏開之請諭開及郭文振史詠王遇張道盧芝等各與所鄰帥府相視可耕土田及瀕河北岸之地分界而種之以給軍餉辛酉鞏州行元帥府報會州破夏人之捷十二月己巳朔徙沁淮巡檢邊軍于內地癸酉以空名宣命金銀符

給完顏開賞功辛巳詔延安土人充司縣官義軍使者選
人代之量免其民差稅邳州民丁死戰陣者各贈官一階
歸德徐邳宿泗永亳潁壽等州復業及新地民免差稅二
年見戶一年嘗供給邳州者復免一年之半睢州陳留杞
縣免三之一丁亥上不豫免朝戊子皇太子率百官及王
妃公主入問起居己丑復入問起居庚寅上崩于寧德殿
壽六十有一上疾大漸暮夜近臣皆出惟前朝資明夫人
鄭氏年老侍側上知其可託詔之曰速召皇太子主後事
言絕而崩夫人秘之是夜皇后及貴妃龐氏問安寢閣龐
氏陰狡機慧常以其子守純年長不得立心鞅鞅夫人恐

其爲變即紿之曰上方更衣后妃可以休他室伺其入遽
鑰之急召大臣傳遺詔立皇太子始啓戶出后妃發喪皇
太子方入宮英王守純已先入皇太子知之分遣樞密院
官及東宮親衛軍官移刺蒲阿集軍三萬餘于東華門街
部署既定命護衛四人監守純於近侍局乃即皇帝位於
柩前壬辰宣遺詔是日詔赦中外明年正月戊戌朔改元
正大謚大行曰繼天興統述道勤仁英武聖孝皇帝廟號
宣宗三月庚申葬德陵

贊曰宣宗當金源末運雖乏撥亂反正之材而有勵精圖
治之志迹其勤政憂民中興之業蓋可期也然而卒無成

功者何哉良由性本猜忌崇信讐御獎用吏胥苛刻成風
舉措失當故也執中元惡此豈可相者乎顧乃懷其援立
之私自除廉陛之分悖禮甚矣高琪之誅執中雖云除惡
律以春秋之法豈逃趙鞅晉陽之責既不能罪而遂相之
失之又失者也遷汴之後北顧有道之朝日益隆盛智識
之士孰不先知方且徂於餘威牽制群議南開宋衅西啓
夏侮兵力旣分功不補患曾未數年昔也日闢國百里今
也日蹙國百里其能濟乎再遷遂至失國豈不重可歎哉

本紀第十六卷

本紀第十七

金史十七

開府儀同三司柱國錄軍國重事尚書右丞相修國史領經筵事都總裁臣脫脫奉

勅修

哀宗上

哀宗諱守緒初諱守禮又諱寧申速宜宗第三子母曰明惠皇后王氏賜姓溫敦氏仁聖皇后之女兄也承安三年八月二十三日生於翼邸仁聖無子養爲己子泰和中授金紫光祿大夫宣宗登極進封遂王授祕書監改樞密使貞祐初莊獻太子守忠薨立皇孫鏗爲皇太孫尋又薨四年正月己卯立守禮爲皇太子仍控制樞密院事詔略曰

子以母貴遂王守禮地鄰冢嫡慶集元妃立爲皇太子其
典禮有司條具以聞四月甲午用太子少保張行信言更
賜名守緒元光二年十二月庚寅宣宗崩辛卯奉遺詔即
皇帝位于柩前壬辰詔大赦略曰朕述先帝之遺意有便
於時欲行而未及者悉奉而行之國家已有定制有司往
徃以情破法使人罔遭刑憲今後有本條而不遵者以故
入人罪罪之草澤士庶許令直言軍國利害雖涉譏諷無
可采取者並不坐罪

正大元年春正月戊戌朔詔改元正大庚子上居廬百官
始奏事祕書監權吏部侍郎蒲察合住改恒州刺史左司

員外郎泥厖古華山同知損州軍州事遂二姦臣大夫士
相賀邠州節度使移刺术納阿卜貢白兔詔曰得賢臣輔
佐年穀豐登此上瑞也焉事此爲令有司給道里費縱之
本土禮部其徧諭四方使知朕意丁巳詔朝臣議脩復河
中府禮部尚書趙秉文太常卿楊雲翼等言陝西民方疲
敝未堪力役遂止戊午上始視朝大司農守汝州防禦使
李蹊爲太常卿權叅知政事平章政事荆王守純罷判睦
親府叅知政事僕散五斤罷充大行山陵使尊皇后溫敦
氏元妃溫敦氏皆爲皇太后號其宮一曰仁聖一曰慈聖
百官入賀于隆德殿是日大風飄端門瓦赤盡合喜權樞

傳副使有男子服麻衣望承天門且笑且哭詰之則曰吾
笑笑將相無人吾哭哭金國將亡群臣請寘重典上持不
可曰近詔草澤諸人直言雖涉譏訕不坐法司唯以君門
非笑哭之所重杖而遣之南陽民布陳謀反伏誅三月焚
賊犯左執法戊申奉安宣宗御容于孝嚴寺辛亥丞相高
汝礪薨癸丑葬宣宗于德陵甲寅起復邠州節度使致仕
張行信爲尚書左丞以延安帥臣完顏合達戰禦有功授
金虎符權叅知政事行尚書省事于京兆兼統河東兩路
夏四月癸酉宣宗拊廟大赦中外熒惑犯右執法五月戊
戌平章政事把胡魯薨癸卯樞密副使完顏賽不爲平章

政事權叅知政事石鑑尉忻爲尚書右丞太常卿李蹊爲翰林承旨仍權叅政甲辰賜策論進士李术論長河以下十餘人及第經義進士張介以下五人及第戊申賜詞賦進士王鶚以下五十人及第詔刑部登聞檢鼓院毋鎖閉防護聽有冤者陳訴六月甲戌宰執請擊鞠上以心喪不許辛卯立妃徒單氏爲皇后遣樞密判官移剌蒲阿率兵至光州撈諭宋界軍民更不南伐秋七月己亥詔諭百官各勤乃職癸卯補修大樂九月樞密判官移剌蒲阿復澤潞獲馬千疋冬十月戊午夏國遣使來修好十二月乙巳桓州刺史蒲察合住有罪伏誅甲寅宣宗小祥燒飯于德

陵改定辟舉縣令法以六事課縣令京東西南陝西護大
司農司兼採訪公事京師大司農總之左丞張行信書先
帝詔國內刑不上大夫治以廉恥丞相高琪所定職官犯
罪的決百餘條乞改依舊制上欲彰先帝之過略施行之
二年春正月甲申有黃黑之祲夏四月辛卯朔恒山公武
仙自真定府來奔起復平章政事致仕華國公晉鼎爲平
章政事行省事于衛州進封英國公甲午以京畿旱遣使
慮囚鈞許州大雨雹丁酉宿鄭州雨傷麥五月丁丑以旱
甚責已避正殿減常膳赦罪蘇椿自大名來奔詔置椿許
州秋七月都水蒲察毛花輦殺人免死除名八月鞏州元

帥田瑞反行省軍圍之其母第十哥殺瑞出降赦其罪以爲涇州節度使世襲猛安九月夏國和議定以兄事金各用本國年號遣使來聘奉國書稱弟冬十月以夏國修好詔中外新軍政改總領爲都尉已酉以誅田瑞詔中外癸亥遣禮部尚書奧敦良弼大理卿裴滿欽甫侍御史烏古孫弘毅爲夏國報成使國書稱兄乙亥面諭臺諫完顏素蘭陳規曰宋人輕犯邊界我以輕騎襲之冀其懲創通好以息吾民耳夏人從來臣屬我朝今稱帝以和我尚不以爲辱果得和好以安吾民尚欲用兵乎卿等宜悉朕意移刺蒲阿及宋人戰于朮州獲馬數千殺人千餘而還內族

王家奴故殺鮮于主簿權貴多救之者上曰英王朕兄敢妄撻一人乎朕爲人主敢以無罪害一人乎國家衰弱之際生靈有幾何而族子恃勢殺一主簿吾民無主矣特命斬之詔有司爲死節士十有三人立褒忠廟禁宿泗青口巡邊官兵毋復擅殺過淮紅衲軍詔趙秉文楊雲翼作龜鏡萬年錄

三年春正月丁巳朔夏國遣使來賀三月陝西旱平章政事齊鼎復請致仕不許詔尚書省議省減用度夏四月辛卯親享于太廟郕國夫人車經御路過廟前馭者乘馬二婢坐車中俱不下詔繫獄杖之辛丑以旱遣官禱于濟瀆

癸卯祈于太廟禁織扇河南大雨雹已酉遣使慮囚遣使
捕蝗五月己未大雨宋兵掠壽州境癸亥永州桃園軍失
利死者四百人乙丑大雨壬申詔諭隴州趙甫等能以土
地來歸當任使之六月辛卯京東大雨雹蝗盡死壬子詔
諭高麗及遼東行省葛不韜討反賊萬家奴赦脅從者秋
七月庚午平章政事英國公胥鼎薨八月移刺蒲阿復曲
沃及晉安辛卯詔設益政院于內廷以禮部尚書楊雲翼
等爲益政院說書官日二人直備顧問冬十月丁酉夏使
來報哀十一月庚申議與宋修好戊辰又議之己巳宋忠
義軍夏全自楚州來歸楚州王義深張惠范成進以城降

封四人爲郡王辛未改楚州爲平淮府以夏全等來降赦諸路從宋及淮楚官吏軍民并其家屬甲戌遣使夏國賀正旦丙子夏以兵事方殷來報各停使聘

大元兵征西夏平中興府召陝西行省及陝州總帥完顏訛可靈寶總帥紇石烈牙吾塔赴汴議兵事詔諭陝西兩省凡戎事三品以下官聽以功過賞罰之銀二十五萬兩從其給賞遣中大夫完顏履信爲弔祭夏國使

四年春正月辛亥朔壬戌增築中京城浚汴城外濠二月蒲阿牙吾塔復平陽執知府李七斤獲馬八千三月簽勞效官充軍有怨言不果用以銀贖平陽虜獲男女分賜官

軍者聽自便

大元兵平德順府節度使愛申攝府判馬肩龍死之

大元兵復下平陽已巳徵夏稅二倍夏五月丁丑議乞和
于

大元

大元兵平臨洮府總管陟蒲胡土門死之陝西行省進三
策上策自將出戰中策棄陝州下策棄秦保潼關不從六
月戊申朔遣前御史大夫完顏合周爲議和使丙辰地震
太白入井賜詞賦經義廬亞以下進士第秋七月

大元兵自鳳翔徇京兆關中大震工部尚書師安石爲尚

書右丞壬辰以中丞烏古孫卜吉祭酒裴滿阿虎帶兼司
農卿簽民軍勸率富民入保城聚兼督秋稅令百姓知避
遷之計丁酉赦陝西東西兩路賜民今年租八月庚戌詔
有司罷遣防備丁壯修城民夫軍須差發應不急者權停
已巳萬年節同知集賢院史公奕進之定遺訓待制呂造
進尚書要略是日大風落左掖門鷗尾壞丹鳳門扉隕霜
禾盡損李全自益都復入楚州據之遣總帥完顏訛可元
帥慶山奴守盱眙與全戰于龜山敗績冬十月辛酉右拾
遺李大節右司諫陳規劾同判睦親府事撒合輦姦賊不
報壬戌外臺監察御史諫獵上怒以邀名賣直責之詔贈

德順府死事愛申馬肩龍等官以淮南王爵招李全十一月乙未未時日上有二白虹貫之丁酉獵于近郊十二月真授李蹊叅知政事

大元兵下商州壬子遣使安撫陝西以牛千頭賜貧民五年春正月丁丑親祭三廟庚辰遣知開封府事完顏麻斤出如

大元弔慰丙戌議擊盱眙辛卯以龜山之敗降元帥慶山奴爲定國軍節度使二月乙巳朔大寒雷雨雪木之華者盡死癸丑詔有司以臨洮總管陞蒲胡土門塑像入褒忠廟書死節子孫于御屏量材官使之三月甲戌朔群臣請

依祖宗故事樞密院聽尚書省節制不從乙酉監察御史
烏古論不魯刺劾近侍張文壽張仁壽李麟之受饋遺曲
赦其罪而出之夏四月甲辰朔以御史言三姦不已凡四
日不視朝八日議放還西夏人口丙寅右丞師安石薨親
衛軍王咬兒酗酒殺其孫大理寺當以徒刑特命斬之五
月癸巳定國軍節度使慶山奴以受賂奪一官六月壬戌
以旱赦雜犯死罪已下秋七月戊子同判睦親府事撒合
輦出爲中京留守行樞密院事八月乙卯以旱遣使禱于
上清宮甲子參知政事白撒爲尚書右丞太常卿顏蓋世
曾權參知政事增築歸德行樞密院擬工役數百萬詔遣

權樞密院判官白華喻以農夫勞苦減其工三之二以節制不一併衛州帥府於恒山公府命白華往經畫之九月庚寅雨足始種麥冬十一月辛巳進宣宗實錄十二月庚子朔日有食之完顏麻斤出以奉使不職免死除名壬子完顏訥申改侍講學士充國信使以陝西大寒賜軍士柴炭銀有差京兆鳳翔府司竹監退竹令分給之

六年春二月丙辰樞密院判官移剌蒲阿權樞密副使耀州刺史李興有戰功詔賜玉兔鵲帶金器以丞相完顏賽不行尚書省事于關中召平章政事完顏合達還朝移剌蒲阿率忠孝軍總領完顏陳和尚忠孝軍一千騎駐邠州

遣白華馳喻蒲阿以用兵之意詔樞密更給忠孝軍馬疋以漸調發都尉司步卒及忠孝馬軍屯京西以白華專備軍須三月乙亥忠孝軍總領陳和尚有戰功授定遠大將軍平涼府判官卅龍襲謀克夏五月隴州防禦使石抹冬兒進黃鸚鵡詔曰外方獻珍禽異獸違物性損人力令勿復進秋七月罷陝西行省軍中浮費八月移刺蒲阿再復澤潞九月泚河蘭會元帥顏盞蝦蟆進西馬二疋詔曰卿武藝超絕此馬可充戰用朕乘此豈能盡其力既入進即尚廐物也今以賜卿其悉朕意冬十月移刺蒲阿東還令陳和尚率陝西歸順馬軍屯鈞許

大元兵駐慶陽界詔陝西行省遣使奉羊酒幣帛乞緩師
請和十一月遣使釣許選試陝西歸順人得軍二千以藝
優者充忠孝軍次充合里合軍十二月詔副樞蒲阿總帥
紇石烈牙吾塔權簽樞密院事完顏訛可救慶陽罷附京
獵地百里聽民耕稼

七年春正月副樞蒲阿總帥牙吾塔權簽院事訛可解慶
陽之圍以訛可屯邠州蒲阿牙吾塔還京兆夏五月詔釋
清口宋敗軍三千人願留者五百人以屯許州餘悉縱遣
之賜經義詞賦李瑋以下進士第秋七月以平章政事合
達權樞密副使八月賜陝西死事之孤鹽引及絹仍量材

任使

大元兵圍武仙于舊衛州冬十月平章合達副樞蒲阿引
兵救衛州衛州圍解上登承天門犒軍合達蒲阿並世襲謀
克穆刺蒲阿權參知政事同合達行省事于閭鄉以備潼關
八年春正月

大元兵圍鳳翔府遣樞密院判官白華右司郎中夾谷八
里門諭閭鄉行省進兵合達蒲阿以未見機會不行復遣
白華諭合達蒲阿將兵出關以解鳳翔之圍又不行夏四
月丁巳朔赦全免京西路軍需錢一年旱災州縣差稅從
實減貸

大元兵平鳳翔府兩行省棄京北遷居民於河南留慶山
奴守之五月李全妻楊妙真以全陷沒于宋構浮梁楚州
北欲復宋讎遣合達蒲阿屯桃源界激河口以備侵軼宋
八里莊人拒其主將納合達蒲阿詔改八里莊爲鎮淮府
秋七月宋將焚浮梁九月丙申慈聖宮皇太后溫敦氏崩
遣諸園陵制度務從儉約

大元兵駐河中府慶山奴棄京北東還召合達蒲阿赴汴
議引兵趨河中府懼不敢行還陝州出師至冷水谷而歸
大元兵攻河中府合達蒲阿遣元帥王敢率兵萬人救之
冬十月右丞相賽不致仕十一月丁未

大元進兵嶢峯關由金州而東省院議以逸待勞未可與
戰上諭之曰南渡二十年所在之民破田宅鬻妻子竭財
勝以養軍今兵至不能逆戰止以自護京城縱將何以為
國天下其謂我何朕思之熟矣存與亡有天命惟不負吾
民可也乃詔諸將屯軍襄鄧十二月己未葬明惠皇后河
中府破權簽樞密院事章火訛可死之元帥板子訛可擄
敗卒三千走關鄉詔赦將佐以下杖訛可二百以死合達
蒲阿率諸軍入鄧州楊汰衍陳和尚武仙皆引兵來會出
屯順陽戊辰

大元兵渡漢江而北丙子畢渡合達蒲阿將兵禦于禹山

之前

大元兵分道趨汴京京師戒嚴是夜二鼓合達蒲阿引軍還鄧州

大元兵躡其後盡獲其輜重

天興元年

是年本正大九年正月改元開興四月又改元天興

春正月壬午朔日有

兩珥

大元兵道唐州元帥完顏兩婁室與戰襄城之汝墳敗績兩婁室走汴京遣完顏麻斤出等部民丁萬人決河水衛京城癸未置尚書省樞密院于官中以便召問起前元帥古里甲石倫權昌武軍節度使行元帥府事合達蒲阿引

軍自鄧州赴汴京乙酉以點檢夾谷撒合爲總帥將步騎三萬巡河渡權近侍局使徒單長樂監其軍起近京諸色軍家屬五十萬口入京丙戌

大元兵既定河中由河清縣白坡渡河丁亥長樂撒合引兵至封丘而還戊子左司郎中斜卯愛實上書請斬長樂撒合以肅軍政不從都尉烏林荅胡土一軍自潼關入援至偃師聞

大元兵渡河遂走登封少室山壬辰衛州節度使完顏斜捻阿不棄城走汴甲午修京城樓櫓及守禦備

大元兵薄鄭州與白坡兵合屯軍元帥馬伯堅以城降防

禦使烏林答咬住死之乙未

大元游騎至汴城丁酉大雪

大元兵及兩省軍戰釣州之三峯山兩省軍大潰合達陳和尚楊沃衍走釣州城破皆死之樞密副使蒲阿就執尋亦死武仙走密縣自是兵不復振己亥徐州行省完顏慶山奴引兵入援義勝軍校侯進杜正張興率所部北降慶山奴入睢州庚子御端門肆赦改元開興辛丑潼關守將李率以關降

大元壬寅扶溝民錢大亨李鈞叛殺縣令王浩及其簿尉庚戌許州軍變殺元帥古里甲石倫粘合仝周蘇椿等以

城降

大元二月壬子朔慶山奴謀走歸德至陽驛店遇

大元兵徐帥完顏兀里力戰而死慶山奴被擒使招京城
不從睢州刺史張文壽棄城從慶山奴皆死之甲寅

大元兵徇臨渙攝縣令張若愚死之戊午次盧氏關陝行
省總帥兩軍及秦藍帥府軍棄潼關而東與之遇天又大
雪未戰而潰行省徒單兀典總帥納合合閏敗死完顏重
喜降斬于馬前都尉鄭侑殺都尉苗英亦降秦藍總帥府
經歷商衡死之

大元兵下睢州庚申翰林待制馮延登使北來歸乙丑

大元兵攻歸德庚午起復右丞相致仕賽不爲左丞相括
京師民軍二十萬分隸諸帥人月給粟一石有五斗三月
丁亥

大元軍平中京留守撒合輦投水死甲午命平章政事白
撒宿上清宮樞密副使合喜宿大佛寺以備緩急

大元遣使自鄭州來諭降使者立出國書以授譯史譯史
以授宰相宰相跪進上起立受之以付有司書索翰林學
士趙秉文衍聖公孔元措等二十七家及歸順人家屬蒲
阿妻子繡女弓匠鷹人又數十人庚子封荆王子訛可爲
曹王議以爲質密國公璫以曹王幼請代行上慰遣之不

聽其代壬寅尚書左丞李蹊送曹王出質諫議大夫裴滿
阿虎帶太府監國世榮爲講和使戶部侍郎楊愷權察知
政事分軍防守四城

大元兵攻汴城上出承天門撫西面將士千戶劉壽語不
遜詔釋勿問癸卯上復出撫東面將士親傳戰傷者藥于
南薰門下仍賜卮酒出內府金帛器皿以賞戰士乙巳鳳
翔府砲軍萬戶王阿驢樊喬來歸己酉造革車三千兩己
而不用置局養無家俘民夏四月癸丑兵士李新有功擢
四方館使元帥劉益叱其子戰死丁巳遣戶部侍郎楊仁

奉金帛詣

大元兵乞和戊午又以珍異往謝許和癸亥明惠皇后陵
被發失柩所在遣中官往視之至是始得以兵護宮女十
人出迎朔門奉柩至城下設御幄安置是夜復葬之戮鄭
僞妻子甲子御端門肆赦改元天興詔內外官民能完復
州郡者功賞有差出金帛酒炙犒飫軍士減御膳罷冗貧
放宮女上書不得稱聖改聖旨爲制旨釋鎬厲王衛紹王
二族禁錮聽自便乙丑百官初起居于隆德殿前丙寅以
尚書省兼樞密院事丁卯放宮女聽以衣裝自隨金珠留
犒士卒汴京解嚴步軍始出封丘門采薪蔬已巳建威都
尉完顏元論同

大元使沒忒入城庚午見使臣於隆德殿放宮女如前辛未開鄭門聽百姓男子出入甲戌御承天門大饗將士聞有聲屈者乃還宮乙亥有詔止奏事許州進櫻桃五月辛巳遷民告出城者以萬數賽不白撒不聽乙酉以南陽郡王子思烈行尚書省于鄧州召援兵丙戌拜天於大慶殿詔白撒致仕放京城四面軍李辛不奉詔丁亥鑿洧川漕渠尋罷之馮延登以奉使有勞授禮部侍郎戊子裕州鎮防軍將領賀都喜率西軍二千人入援放遷民出京辛卯大寒如冬密國公璫薨汴京大疫凡五十日諸門出死者九十餘萬人貧不能葬者不在是數癸巳楊春入據亳州

觀察判官劉均死之辛丑上御香閣面責宰相乙巳將相
受保城爵賞六月庚戌朔詔百官舉大將衆舉劉益不能
用癸丑飛虎軍二百人奪封丘門出奔甲寅以出師錮門
禁乙卯白撒開渠於私第東丙辰閱官馬擇瘠者殺以食
丁巳封仙據徐州徒單益都走宿州推張興行省事庚申
塞京城四門以便守禦壬戌國用安入徐州殺張興推封
仙爲元帥以主州事己巳詔贈禦侮中郎將完顏陳和尚
鎮南軍節度使立褒忠廟碑權叅知政事楊愷罷辛未復
修汴城以疫後園戶僧道醫師粥棺者擅厚利命有司倍
征之以助其用甲戌宿州鎮防千戶高臘哥李宣殺節度

使統石烈阿虎父子請行省徒單益都主帥事益都不從
率其將吏西走至穀熟遇

大元軍死之乙亥左丞李蹊送曹王與其子全俱還丁丑
恒山公武仙殺士人李汾七月庚辰朔兵刃有火辛巳軍
士搗登聞鼓乞將劉益癸未尚書右丞顏蓋世魯罷吏部
尚書完顏奴申爲叅知政事甲申飛虎軍士申福蔡元擅
殺北使唐慶等三十餘人于館詔貫其罪和議遂絕乙酉
都人揚言欲殺白撒密詔遣衛士護其家丙戌軍士毀白
撒別墅斜捻阿不妄殺市人之過其門者以靖亂丁亥拜
天子承天門下出內府及兩宮物賜軍士戊子下令招軍

辛卯簽民爲兵輩昌民百二十人赴援乙未宿州帥衆僧
奴稱國安用降遣近侍直長因世英等持詔封安用爲充
王行京東等路尚書省事賜姓完顏改名用安新軍有過
登聞鼓者杖殺之乙巳金木火太陰會于軫翼丙午衆知
政事完顏思烈恒山公武仙輩昌總帥完顏忽斜虎率諸
將兵自汝州入援以合喜爲樞密使將兵一萬應之命左
丞李蹊勸諭出師乃行八月己酉朔合喜屯杏花營又益
兵五千人始進屯中牟故城庚戌發丁壯五千人運糧餉
合喜軍辛亥完顏思烈遇

大元兵于京水遂潰武仙退保留山思烈走御寨中京元

帥左監軍任守貞死之合喜棄輜重奔至鄭門聚兵乃入
甲寅免合喜爲庶人籍其家以賜軍士降監軍長樂爲符
寶郎丁巳釋奠孔子戊午括民間粟已未籍徒單元典完
顏重喜納合合闐家貲前儀封令魏璠上言鞏昌帥完顏
仲德沉毅有遠謀臣請奉命往召不報戊辰免府試起復
前大司農侯摯爲平章政事進封蕭國公行京東路尚書
省事己巳摯帥兵行至封丘將士將潰摯止之乃與衆還
汴壬申聽無軍家口戊京甲戌金木果交乙亥賣官及許
買進士第丙子詔罷括粟復以進獻取之丁丑京城民楊
興入貲授延州刺史戊寅劉仲溫入貲授許州刺史

本紀第十七

本紀第十八

金史十八

開府儀同三司桂陽縣國重事勳書右丞相修 國史 經筵事都總裁臣 脫脫 奉

勅修

哀宗下

九月戊寅朔詔減親衛軍已丑軍士殺鄭門守者出奔壬辰起上黨公張開及臨淄郡王王義深廣平郡王范成進爲元帥以前御史大夫完顏合周權叅知政事乙未以勝召民賣放下年軍需錢上戶田租如之辛丑夜大雷工部尚書蒲乃速震死閏月戊申朔遣使以鐵券一虎符六大信牌十織金龍文御衣一越王玉魚帶一弓矢二賜充王

用安其父母妻皆贈封之又以世襲宣命十郡王宣命十王兔鶻帶十付用安其同盟可賜者即賜之辛亥遣張開溫撒辛劉益高顯率步軍護陳留通許糧道罷貧民進獻糧戊午招鄉導己未有箭射入宮中書姦臣姓名兩日而再得之辛酉再括京城粟以御史大夫合周點檢徒單百家等主之內寅括粟使者兵馬都總領完顏九住以粟有蓬稗杖殺孝婦于省門十月以前司農卿李煥飛語詔左丞李蹊戶部侍郎楊慥繫獄將以軍儲失計坐罪俄蹊慥並除名而止籍慥家貲渙遂權戶部尚書尋赦殘欠糧其應以糧事繫者皆釋之詔徵諸道軍期以十二月一日入

援十一月丁未朔賜貧民粥平章政事侯摯致仕左司郎
中斜卯愛實以言事忤近侍送有司尋釋之己酉衛州軍
校白晝取豐備倉米壬子京城人相食癸丑詔曹門宋門
放士民出就食壬戌召諸將相入議事充王用安率兵至
徐州元帥王德全閉城不納會劉安國與宿帥衆僧奴引
兵入援至臨渙用安使人刼殺之攻徐州久不能下退保
連水制使因世英以用安不赴援還至宿州西遇

大元兵死之內寅河解元帥權興寶軍節度使趙偉襲據
陝州以叛殺行省阿不罕奴十刺以下凡二十一人誣阿
不罕奴十刺等反狀以聞上知其冤不能直其事就授偉

元帥左監軍兼西安軍節度使行總帥府事偉尋亦歸北
十二月丙子朔以事勢危急遣近侍即白華問計華對以
紀季以鄴入齊之義遂以爲右司郎中甲申詔議親出乙
酉再議於大慶殿上欲以官奴高顯劉益爲元帥不果是
日除拜扈從及留守京城官以右丞相樞密使兼左副元
帥賽不平章政事權樞密使兼右副元帥白撒右副元帥
兼樞密副使權參知政事訛出兵部尚書權尚書左丞李
蹊元帥左監軍行總帥府事徒單百家等率諸軍扈從參
知政事兼樞密院副使完顏奴申樞密副使兼知開封府
權參知政事習捏阿不裏城四面都總領戶部尚書完顏

珠顆外城東面元帥把撒合南面元帥朮甲咬住西面元帥崔立北面元帥李朮魯買奴等留守除拜既定以京城付之擢魏璠爲翰林修撰如鄧州招武仙入援丁亥上御端門發府庫及兩府器皿宮人衣物賜將士戊戌官奴阿里合謀立荆王不果朝廷知其謀置不問庚子上發南京與太后皇后諸妃別大慟行次公主苑太后遣中官持米肉犒犒軍士辛丑至開陽門外麾百官退詔諭戍兵曰社稷宗廟在此汝等壯士也毋以不預進發之數便謂無功若保守無虞將來功賞願豈在戰士下聞者皆灑泣是日鞏昌元帥完顏忽斜虎至自金昌爲上言京西三百里之

間無井竈不可往東行之議遂決以爲尚書右丞從行遂
次陳留壬寅次杞縣癸卯次黃城丞相完顏賽不之子按
春有罪伏誅甲辰次黃陵岡乙巳諸將請幸河朔從之
二年正月丙午朔濟河北風大作後軍不克濟丁未

大元兵追擊于南岸元帥完顏緒兒賀都喜死之建威都
尉完顏兀論出降己酉上哭祭戰死士于河北岸皆贈官
斬兀論出二弟以殉赦河朔招集兵糧議取衛州元帥蒲
察官奴將忠孝軍千人東面元帥高顯果毅都尉粘哥咬
住領軍萬人爲前鋒至蒲城庚戌上次漚麻岡平章政事
白撒元帥和速嘉兀底不繼至辛亥白撒引兵攻衛州不

克乙卯聞

大元兵自河南渡河至衛之西南遂退師丁巳戰于白公廟白撒敗績棄軍東遁元帥劉益上黨公張開亦遁並爲民家所殺益部曲王全降戊午上進次蒲城復還魏樓村李辛自汴京出奔伏誅己未上以白撒謀夜棄六軍渡河與副元帥合里合六七十人走歸德庚申諸軍始知上已往遂潰辛酉司農大卿蒲察世達元帥完顏忽土出歸德西門奉迎上入歸德赦在府囚軍民普覃一官賜進士終場王輔以下十六人出身遣奉御水甲塔失不后弟徒單四喜往汴京奉迎兩宮白撒還自蒲城聚兵于大橋不敢入

壬戌遣使召白撒至數其罪下之獄仍籍其家財以賜將士曰汝輩宜竭忠力毋如斯人誤國人予金一兩七日白撒及其子忽土鄰皆死獄中右丞相賽不致仕右丞完顏忽斜虎行省事于徐州官奴再請率兵北渡女魯權不可遣歸德知府行戶部尚書蒲察世達都轉運使張俊民如陳蔡取糧以元帥李琦王璧護之戊辰安平都尉京城西面元帥崔立與其黨韓鐸藥安國等舉兵爲亂殺參知政事完顏奴申樞密副使完顏斜捻阿不勒兵入見太后傳令召衛王子從恪爲梁王監國即自爲太師軍馬都元帥尚書令尋自稱左丞相都元帥尚書令鄭王弟倚平章政

事侃殿前都點檢其黨李木魯長河御史中丞韓鐸副元帥兼知開封府折希顏藥安國張軍奴完顏合答並元帥師肅左右司郎中賈良兵部郎中兼右司都事又署工部尚書溫迪罕二十吏部侍郎劉仲周並爲參知政事宜徽使奧屯彛卿爲尚書左丞戶部侍郎張正倫爲尚書右丞左右司都事張節爲左右司郎中尚書省掾元好問爲左右司員外郎都轉運知事王天祺懷州同知康瑋並爲左右司都事開封判官李萬翼棄官去戶部主事鄭著召不起是日右副點檢溫敦阿里左右司員外郎聶天驥御史大夫裴滿阿虎帶諫議大夫左右司郎中烏古孫敏申在

副點檢完顏阿散奉御忙哥講議蒲察珣並死之遂遷款
大元軍前癸酉

大元將碎不解進兵汴京甲戌立閣隨駕官屬軍民子女
於省署及禁民間嫁娶括京城財兩官值變不果行答失
不以其父咬住四喜以其妻奪門而出庚午至歸德上怒
二人皆斬於市乙亥遣右宣徽提點近侍局事移刺粘古
如徐州相地形察倉庫虛實白華如鄧州召兵二月丙子
朔魚山張璪殺元帥完顏忽土行省忽斜虎自率兵討之
會從宜嚴祿誅璪乃還括城中糧知歸德府事石益女魯
權爲樞密副使權參知政事留元帥官奴忠孝軍四百五

十人都尉馬用軍二百八十餘人發餘軍赴宿徐陳三州
就糧三月乙丑石蓋女魯懽乞盡散衛兵出城就食官奴
秋與國用安謀邀上幸海州不從蔡帥烏古論鎬以糧四
百餘斛至歸德表請臨幸上遣學士烏古論蒲鮮以幸蔡
之意諭其州人戊辰官奴以忠孝軍爲亂攻殺馬用遂殺
尚書左丞李蹊參知政事石蓋女魯懽點檢徒單長樂從
官右丞已下三百餘人上赦官奴暴女魯懽罪狀以官奴
爲樞密副使權參知政事左右司郎中張天綱爲戶部侍
郎權參知政事辛卯官奴真授參知政事兼左副元帥官
奴以上居照碧堂禁近諸臣無一人敢奏對者上日悲泣

言曰自古無不亡之國不死之主但恨朕不知用人致爲此奴所囚耳遂與內局令宋珪等謀誅官奴夏四月壬午徐州行省完顏忽斜虎執王德全并其子誅之及其黨王琳揚瓚斜外延壽召經歷商瑀用之魚山從宜嚴祿叛歸連水庚寅陳州都尉李順兒殺行省粘葛奴申及招撫使劉天起送款于崔立張俊民李琦奔汴京王璧還歸德癸巳崔立以梁王從恪荆王守純及諸宗室男女五百餘人至青城皆及於難甲午兩宮北遷甲辰鄧州節度使移刺璦以其城叛與白華俱亡入宋六月己卯官奴及其黨阿里合白進皆伏誅上御雙門赦忠孝軍以安反側遂決策

遷蔡詔蔡息陳穎各以兵來迂中京留守權參政烏林答
胡土棄城奔蔡壬午中京破留守兼便宜總帥強伸死之
戊子召徐州行省完顏忽斜虎赴行在所以抹撚兀典代
行省事郭恩爲總帥兼節度使辛卯上發歸德留元帥王
璧守之壬辰次亳州癸巳以亳州節度使王進同知節度
使王賓徵民丁運鐵甲糗糧留權參政張天綱董之就遷
有功將士臨淄郡王王義深據靈壁望口寨以叛遣近侍
直長女奚烈完出將徐宿兵討之義深敗走漣水入宋丙
申亳州鎮防軍崔復哥殺守臣王賓等張天綱以便宜授
復哥節度使罷運鐵甲糗糧州人乃安己亥上入蔡州詔

尚書省爲書召武仙會兵入援徐州行省抹撚兀典赴蔡州起復右丞相致仕賽不代行省事七月癸卯朔曲赦蔡州管内雜犯死罪以下官吏軍民普覃兩官經應辦者更遷一官弛門禁通衆貨蔡人便之乙巳以烏古論鎬爲御史大夫總帥如故張天綱爲御史中丞仍權參政完顏藥師爲鎮南軍節度使兼蔡州管内觀察使戊申左右司郎中烏古論蒲鮮兼息州刺史權元師右都監行帥府事征行元帥權總帥婁室簽樞密院事己酉選室女備宮中使令已得數人以右丞忽斜虎諫留識文義者一人餘聽自便乙卯遣魏璠徵武仙兵丁已護衛蒲鮮石魯負祖宗御

容至自汴勅有司奉安于乾元寺前御史大夫蒲察世達
西面元帥把撒合自汴來歸辛酉武仙初將士謀取宋金
州至浙水衆潰行六部尚書盧芝侍郎石玠請歸蔡州仙
迫芝不及遂殺玠丁卯定進馬遷賞格又定括馬罪格以
簽樞密院事權參政抹撚兀典領其事遣使分詣諸道選
兵會于蔡己巳以蒲察世達爲吏部侍郎權行六部尚書
八月癸酉朔以秦州元帥粘哥完展權參知政事行省事
於陝西諭以蠟書期九月中徵兵與上會于饒豐關欲出
宋不意以取興元甲戌

大元使王撒諭宋還宋以軍護其行青山招撫盧進得還

更言以聞上爲之懼丁丑上閱兵于見山亭樊素元帥建
珪復立壽州於蒙城詔遷賞有差州縣官皆令其授乙酉
大元召宋兵攻唐州元帥右監軍烏古論黑漢死于戰主
帥蒲察某爲部曲兵所食城破宋人求食人者盡戮之餘
無所犯宋人駐兵息州南丙戌詔權參政抹撚兀典簽樞
密院事兼宣行省院于息州丁亥烏古論鎬權參知政事
兀林答胡土爲殿前都點檢庚寅初設四隅機察官壬辰
息州行省抹撚兀典以兵襲宋人于中渡店斬獲甚衆乙
未萬年節州郡以表來賀二十餘所辛丑設四隅和糴官
及惠民司以太醫數人更直病人官給以藥仍擇年老進

士二人爲醫藥官九月癸卯朔假蔡州都軍致仕內族阿
虎帶同僉大陸親府事使宋借糧入辭上諭之曰宋人負
朕深矣朕自即位以來戒飭邊將無犯南界邊臣有自請
征討者未嘗不切責之向得宋一州隨即付與近淮陰來
歸彼多以金幣爲贖朕若受財是貨之也付之全城秋毫
無犯清口臨陣生獲數千人悉以資糧遣之今乘我疲敝
據我壽州誘我鄧州又攻我唐州彼爲謀亦淺矣

大元滅國四十以及西夏夏亡及於我我亡必及於宋唇
亡齒寒自然之理若與我連和所以爲我者亦爲彼也卿
其以此曉之至宋宋不許戊申魯山元帥元志率兵入援

賜以大信牌升爲總帥庚戌以重九拜天于節度使廳群
臣陪從成禮上面諭之曰國家自開創涵養汝等百有餘
年汝等或以先世立功或以勞効起身被堅執銳積有年
矣今當厄運與朕同患可謂忠矣比聞北兵將至正汝等
立功報國之秋縱死王事不失爲忠孝之鬼徃者汝等立
功常慮不爲朝廷所知今日臨敵朕親見之矣汝等勉之
因賜卮酒酒未竟邏騎馳奏敵兵數百突至城下將士踴
躍咸請一戰上許之是日分軍防守四面及子城以總帥
李本魯妻室守東面內族承麟副之參知政事烏古論鎬
守南面總帥元志副之殿前都點檢兀林答胡土守西面

忠孝軍元帥蔡八兒副之忠孝軍元帥權殿前右副點檢
王山兒守北面元帥統石烈柏壽副之遷授西邊軍節度
使兼殿前右衛將軍行元帥府事女奚烈完出守東南元
帥左都監夾谷當哥副之殿前右衛將軍權左副都點檢
內族斜烈守子城都尉王愛實副之辛亥

大元兵築長壘圍蔡城己未括蔡城粟辛酉禁公私釀酒
十月戊辰更造天興寶會辛巳縱飢民老稚羸疾者出城
癸未徐州守臣郭恩殺逐官吏以叛行省寶不死之甲申
給飢民船聽採城壕菱茨水草以食戊子徵諸道兵辛卯
上闕射于子城中者賞麥有差丙申殿前左副都點檢溫

敦昌孫戰歿戊戌賜義軍戰歿被創者麥十一月辛酉朔
以右副都點檢阿勒根移失刺爲宣差鎮撫都彈壓別設
彈壓四員副之四隅機察亦隸焉宋遣其將江海孟珙帥
兵萬人獻糧三十萬石助

大元兵攻蔡十二月甲戌盡籍民丁防守括婦人壯捷者
假男子衣冠運大石上親出撫軍丁丑

大元兵決練江宋兵決柴潭入汝水己卯

大元兵破外城宿州副總帥高刺哥戰歿辛巳以總帥李
朮魯曩室殿前都點檢兀林答胡土皆權參政都尉完顏
承麟爲東西元帥權總帥己丑

大元兵墻西城上謂侍臣曰我爲金紫十年太子十年人主十年自知無大過惡死無恨矣所恨者祖宗傳祚百年至我而絕與自古荒淫暴亂之君等爲亡國獨此爲介介耳又曰古無不亡之國亡國之君徃徃爲人囚繫或爲俘獻或辱於階庭閉之空谷朕必不至於此卿等觀之朕志決矣都尉王愛實戰歿砲軍總帥王銳殺元帥夾谷當哥率三十人降

大元庚寅以御用器賞戰士甲午上微服率兵夜出東城謀遁及柵不果戰而還乙未殺尚廐馬五十疋官馬一百五十疋犒將士

三年正月壬寅冊柴潭神爲護國靈應王甲辰以近侍分
守四城戊申夜上集百官傳位于東面元帥承麟承麟固
讓詔曰朕所以付卿者豈得已哉以肌體肥重不便鞍馬
馳突卿平日趨捷有將畧萬一得免炸胤不絕此朕志也
己酉承麟即皇帝位百官稱賀禮畢亟出捍敵而南面已
立宋幟俄頃四面呼聲震天地南面守者棄門大軍入與
城中軍巷戰城中軍不能禦帝自縊于幽蘭軒末帝退保
子城聞帝崩率群臣入哭謚曰哀宗哭奠未畢城潰諸禁
近舉火焚之奉御絳山收哀宗骨瘞之汝水上末帝爲亂
兵所害金亡

贊曰金之初興天下莫彊焉太祖太宗威制中國大槩欲
効遼初故事立楚立齊委而去之宋人不競遂失故物熙
宗海陵濟以虐政中原舛望金事幾去天厭南北之兵挺
生世宗以仁易暴休息斯民是故金祚百有餘年由大定
之政有以固結人心乃克爾也章宗志存潤色而秕政日
多誅求無藝民力浸竭明昌承安盛極衰始至於衛紹紀
綱大壞亡徵已見宣宗南渡棄厥本根外捃餘威連兵宋
夏內致困憊自速土崩哀宗之世無足爲者

皇元功德日盛天人屬心日出燭息理勢必然區區生聚
圖存於亡力盡乃斃可哀也矣雖然在禮國君死社稷哀

宗無愧焉

本紀第十八

本紀第十九

金史十九

開禧三司在國經國事書若希修

國經經事都總管 脫脫 奉

勅修

世紀補

景宣皇帝諱宗峻本諱繩果太祖第二子母曰聖穆皇后
唐括氏太祖元妃宗峻在諸子中最嫡天輔五年忽魯勃
極烈果都統諸軍取中京帝別領合扎猛安受金牌既克
中京遂與果俱襲遼主于駕鴛樂遼主走陰山耿守忠救
西京帝與宗翰等擊走之西京城南有浮圖敵先據之下
射士卒多傷帝曰先取是則西京可下既而攻浮圖克之

遼下西京太祖崩帝與兄宗幹率宗室羣臣立太宗天會
二年薨熙宗即位追上尊謚曰景宣皇帝廟號徽宗改葬
興陵海陵弒立降熙宗爲東昏王降帝爲豐王世宗復尊
熙宗廟謚尊帝爲景宣皇帝子合剌常勝查剌合剌是爲
熙宗

睿宗立德顯仁啓聖廣運文武簡肅皇帝諱宗堯初諱宗
輔本諱訛里朶大定上尊謚追上今諱魁偉尊嚴人望而
畏之性寬恕好施惠尚誠實太祖征伐四方諸子皆總戎
旅帝常在帷幄天輔六年太祖親征太宗居守黃龍府安
福哥誘新降之民以叛帝與烏古廼討平之南路軍帥鶻

實者以賊敗帝往閱實之咸稱平允天會五年宋望薨帝
爲右副元帥駐兵燕京十一月分遣諸將伐宋帝發自河
間徇地淄青宋馬括兵二十萬至樂安帝率師擊破之聞
宋主在揚州時東作方輿留大軍夾河屯田而還軍山西
二月移刺古破宋臺宗雋宋忠軍五萬于大名明日再破
之獲宗雋忠而還冀州人乘夜出兵襲照里營照里擊敗
之宋主奉表請和密書以誘契丹漢人詔伐宋帝發自河
北降滑州取開德府攻大名府克之河北平初伐宋河北
河東諸將議不決或欲先定河北或欲先平陝西太宗兩
用其策而宗翰來會于濮旣平河北遂取東平及徐州盡

得宋人江淮運致金幣在徐州官庫者分給諸軍而劉豫遂以濟南降使拔离速等襲宋主于揚州而宋主聞之北拔离速至揚州前夕已渡江矣宋主乃貶去帝號再以書來請存社稷語在宗翰傳中既而宗弼追宋主宋主渡江入于杭州復遜入海宗弼乃還於是婁室所下陝西城邑輒叛宗翰等曰前討宋故分西師合于東軍而陝西五路兵力雄勁當併力攻取今撻懶撫定江北宗弼以精兵二萬先往洛陽以八月往陝西或使宗弼遂將以行或宗輔宗翰希尹中以一人往上曰婁室往者所向輒辦今專征陝右豈倦于兵而自愛邪卿等其戮力焉由是詔帝往是

時宋張浚兵取陝西帝至洛水治兵張浚騎兵六萬步卒
十二萬壁富平帝至富平棗室爲左翼宗弼爲右翼兩軍
並進自日中至于昏暮凡六合戰破之耀州鳳翔府皆來
降遂下涇渭二州敗宋經略使劉侂軍于瓦亭原州降撒
离喝破德順軍靜邊寨宋涇原路統制張中孚知鎮戎軍
李彥珩以城降宋秦鳳路都統制吳玠軍于隴州境上招
討都監馬五擊走之降一縣而還帝進兵降甘泉等三堡
取保川城破宋熙河路副總管軍三萬獲馬千餘拔安西
等二寨熙州降分遣左翼都統阿盧補右翼都統宗弼招
撫城邑之未下者遂得鞏洮河樂西寧蘭廓積石等州定

遼和政甘峪寧洮安隴等城寨及鎮堡蕃漢營部四十餘
於是涇原熙河兩路皆平撒馬喝降慶陽府慕清以環州
降既定陝西五路乃選騎兵六千使撒馬喝列屯衝要於
是班師與宗翰俱朝京師立熙宗爲諸版勅極烈帝爲左
副元帥十三年行次媯州薨年四十陪葬睿陵追封潞王
謚襄穆皇統六年進冀國王正隆二年追贈太師上柱國
改封許王世宗即位追上尊謚立德顯仁啓聖廣運文武
簡肅皇帝廟號睿宗二年改葬于大房山號景陵

顯宗體道弘仁英文睿德光孝皇帝諱允恭本諱胡土瓦
世宗第二子母曰明德皇后烏林答氏皇統六年丙寅歲

生體貌雄偉孝友謹厚大定元年十一月世宗即位于東
京乙酉封楚王置官屬十二月從至中都二年四月己卯
賜名允迪五月壬寅立為皇太子世宗謂之曰在禮貴嫡
所以立卿卿友于兄弟按百官以禮勿以儲以生驕慢日
勉學問非有召命不須侍食帝上表謝專心學問與諸儒
臣講議於承華殿燕閑觀書乙夜忘倦翼日輒以疑字付
儒臣校證九月庚子詔東宮三師對皇太子稱名少師以
降稱臣十一月庚子生辰百官賀于承華殿世宗賜以襲
衣良馬賜宴于仁政殿皇族百官皆與自後生辰世宗或
幸東宮或宴內殿歲以為常十二月辛卯奏曰東宮賀禮

親王及一品皇族皆北面拜伏臣但蒼揖伏望天慈聽臣
荅拜庶悖親親友愛之道世宗從之以爲定制世宗聞儒
者鄭松賢松先爲同知傳州防禦事致仕起爲左諭德詔
免朝參令輔太子讀書松以友諭自處帝嘗顧松使取服
帶松對曰臣忝諭德不敢奉命帝改容稱善自是益加禮
遇每出獵獲鹿輒分賜之四年九月納妃徒單氏行親迎
禮故事大駕鹵簿天子乘玉路皇太子鹵簿乘金路六年
世宗行自西京還都禮官不知皇太子自有鹵簿金路乃
請太子就乘大駕綴路行在天子之前上疑其非禮詳閱
舊典禮官始覺其誤於是禮部郎中李邦直貢外郎李山

前一階太常少卿武之才太常丞張子羽博士張槩削兩階頃之禮官議受冊謁謝太廟服常朝服乘馬世宗曰此與外官禮上後謁諸神廟無異海陵一時率意行之何足爲法大冊與三歲祫享當用古禮爲是孔子曰禮與其奢也寧儉不當輕易如此又曰右丞蘇保衡雖漢人不通經史參政石琚通經史而不言前日禮官旣已削奪猶不懼邪其具前代典禮以聞朕將擇而處之久之將授太子冊寶儀注備儀仗告太廟上曰朕受尊號謁謝乃用故宋真宗故事常朝服乘馬皇太子乃用備禮前後不稱甚無謂也謂右丞相良弼左丞守道曰此卿等不用心所致良弼

等謝曰臣愚慮不及此上復曰此文臣因循故也是年十月甲申祫享于太廟行亞獻禮七年帝有疾詔左丞守道侍湯藥徙居瓊林苑臨芳殿調治八年正月甲戌改賜名允恭庚戌受皇太子冊寶帝上表謝九年五月世宗命避暑于草濼隋王惟功從行其應從行者皆給道路費帝奏曰遠去闕廷獨就涼地非臣子所安願罷行世宗曰汝體羸弱山後高涼故命汝往丁丑百官奉辭于都城之北再拜帝荅拜是月百官承詔具牋問起居六月百官問起居如前八月乙酉至自草濼百官迎謁于都城之北如送儀丙戌入見世宗曰吾兒相別經夏極甚思憶也九月詔皇

太子供膳勿月支歲給五十萬十年八月帝在承華殿經筵太子太保壽王爽啓曰殿下頗未熟本朝語何不屏去左右漢官皆用女直人帝曰諭德贊善及侍從官曷敢輒去爽乃揖而退帝曰官官四負謂之諭德贊善義可見矣而反欲去之無學故也有使者自山東還帝問民間何所苦使者曰錢難最苦官庫錢滿有露積者而民間無錢以此苦之帝曰貯之空室雖多奚爲謂戶部尚書張仲愈曰天子富藏天下何必獨在府庫也因奏曰錢在府庫何異銅鑛在野乞流轉使公私俱利世宗嘉納詔有司議行之十一月丁亥有事於圓丘帝行亞獻禮十二年五月世宗

聞德州防禦使胡刺謀叛因曰朕於親親之道未嘗不篤而輒敢如此帝徐奏曰叔胡刺性荒縱耽娛樂而無子嗣忽如此狂謀望更閱實之十月己未裕幸于太廟帝攝行祀事十三年十月承詔與趙王惟中曹王惟功獵于保州定州十一月甲午還京師十四年四月乙亥世宗御垂拱殿帝及諸王侍側世宗論及兄弟妻子之際世宗曰婦言是聽而兄弟相違甚哉帝對曰思齊之詩曰刑于寡妻至于兄弟以御于家邦臣等愚昧願相勵而修之因引常棣華萼相承脊令急難之義爲文見意以誡兄弟焉十五年世宗詔五品職事官謝見皇太子十七年五月甲辰侍宴

于常武殿典食令湜合進粥帝將食有蜘蛛在粥盃中湜
合恐懼失措帝從容曰蜘蛛吐絲乘空忽墮此中爾豈汝
罪哉十月己卯祫享于太廟攝行祀事十九年四月戊申
有事于太廟攝行祀事丁巳詹事烏林荅愿入謝帝命取
幘頭腰帶官屬請曰此見宰相師傅之禮也帝曰愿事陛
下久以此加敬耳皆曰非臣等所及十一月改葬明德皇
后于坤厚陵帝徒行輓靈車遇大風雪左右進雨具上却
之比至頓所衣盡濡濕觀者無不下淚海陵雖貶黜爲庶
人宗幹尚稱明肅皇帝議者以爲未盡帝具表奏論世宗
嘉納之於是宗幹削去帝號降封遼王二十四年世宗將

幸上京詔帝守國作守國之寶以授之其遣使祭享五品以上官及事利害重者遣使馳奏六品以下官其餘常事並聽裁決每三日一次於集賢殿受尚書省啓事京朝官遇朔望具朝服問候車駕在路每二十日一遣使問起居已達上京每三十日一問起居世宗曰今巡幸或能留一二年以汝守國譬之農家種田商人營利但能不墜父業即爲克家子也帝對曰臣在東宮二十餘年過失甚多陛下以明德皇后之故未嘗見責臣誠愚昧不克負荷乞備扈從世宗曰凡人養子皆望投老得力朕留太尉左右丞參政輔汝彼皆國家舊人可與商議且政事無難但用心

公正無納讒邪一月之後政事自熟帝流涕堅辭左右爲之感動三月世宗如上京帝守國留中都初帝在東宮或携中侍步于芳苑中侍出入禁中未嘗限阻此輩見帝守國各爲得意帝知之謂諸侍中曰我向在東宮不親國政日與汝輩語話今旣守國汝等有召命然後得入五月世宗至上京賜勅書曰朕以前月八日到遼陽此月二日達上京翌日祀慶元廟省方觀民古之制也汝守國任重夏暑方熾益當自愛無貽朕憂帝謂徒單克寧曰車駕巡幸以國事見屬刑名最重人之死生繫焉凡有可議當盡奏公比主上還都勿有廢事自是凡啓稟刑名帝自披閱召

都事委曲折正移晷忘倦或賜之食近侍報瑤池位蓮開
當設宴帝曰聖上東巡命我守國何敢宴遊廢事採致數
花足矣七月遣子金源郡王麻達葛奉表問起居請世宗
還都十一月壬寅帝冬獵辛亥還都二十五年正月乙酉
免羣臣賀禮帝自守國深懷謙抑宮臣不庭拜啟事時不
侍立免朔望禮京朝朔望日當具公服問候並停免至是
羣臣當賀亦不肯受甲寅帝如春水二月庚申還都丁卯
遣子金源郡王麻達葛奉表賀萬春節四月久不雨帝親
禱即日霑足六月甲寅帝不豫庚申崩于承華殿世宗自
上京還次天平山好水川訃聞為位臨奠于行宮之南大

慟者久之親五百官皇族命婦及侍衛皆會哭世宗號泣還宮比至中都爲位奠哭者凡七焉世宗以幽王永成爲中都留守來護喪遣滕王府長史再與御院通達阿里剌來保護金源郡王遣左宣徽使唐括鼎來致祭詔妃徒單氏及諸皇孫喪服並如漢制帝在儲位久恩德在人者深每日三時哭臨侍衛軍士皆爭入臨伏哭于承華殿下聲殷如雷中都百姓市門巷端爲位慟哭七月壬午朔賜謚宣孝太子九月庚寅殯于南園熙春殿已酉世宗至自上京未入國門先至熙春殿致奠慟哭久之比葬親臨者六帝事世宗凡巡幸西京涼陞及上陵祭廟謁衍慶宮田獵

禮樂拜天射柳未嘗去左右上有事于園丘及親享于太廟則行亞獻禮不親祀則攝行祀事國有大慶則率百官上表賀正旦萬春節則總班上壽冬十月庚戌朔宰相以下朝見于慶和殿太尉完顏守道上壽世宗追悼懷愴者久之十一月甲申靈駕發引世宗路祭于都城之西庚寅葬于大房山世宗欲加帝號以問羣臣翰林修撰趙可對曰唐高宗追謚太子弘為孝敬皇帝左丞張汝弼曰此蓋出于武后遂止乃建廟于衍慶宮後祭用三獻樂用登歌二十六年立子璟為皇太孫二十九年世宗崩太孫即位是為章宗五月甲午追謚體道弘仁英文睿德光孝皇帝

廟號顯宗丁酉祔于太廟陵曰裕陵帝天性仁厚不忍刑殺梁檀兒盜金銀葉憐其母老李福興盜段匹值坤厚陵禮成家令本把盜銀器值萬春節皆委曲全活之亡失物者責其償而不加罪聞四方饑饉輒先奏加賑贍因田獵出巡所過問民間疾苦敬禮大臣友愛兄弟葬明德皇后于坤厚陵諸妃皆祔自磐寧宮發引趙王惟中以其母輜車先發令張黃蓋者前行帝呼執蓋者不應少府監張僅言欲奏其事帝止之嘗作重光座銘及刻左右銘于小玉碑并刻其碑陰皆深有理致最善射而不殫物嘗奉詔拜陵先獵射一鹿獲之即命罷獵曰足奉祀事焉用多殺好

生蓋其天性云

贊曰遼王杲取中京宗翰宗望皆從景宣別領合扎猛安
合扎猛安者太祖之猛安也宗翰請立熙宗宗翰不敢違
太宗不能拒其義正其理直矣舊史稱睿宗寬恕好施惠
熙宗不終海陵隕斃自時厥後得大位者皆其子孫有以
夫顯宗孝友惇睦在東宮二十五年不聞有過承意開導
四方陰受其賜天不假之年惜哉

本紀第十九